

Siunnersuummut nassuiaatit

Nassuiaatit nalinginnaasut

1. Aallaqqaasiut

1981-mi, Areaalit (nunaminertat/imartat) atorneqarnerat, illoqarfiit allilerneqarneri sanaartorfigineqarnerilu pillugit Kalaallit Nunaannut inatsit nr. 612, 23. december 1980-meersaq, suliaaqqarfiup Namminersornerullutik Oqartussanut 1. januar 1981-mi nuunneqarnera tunngavigalugu inatsit piginnaatitsissut naapertorlugu nunamik atuineq, nuna tamakkerlugu pilersaarusionerq aamma illoqarfimmik pilersaarusionerq illuliortiternerlu pillugit Inatsisartut peqqussutaa nr. 1, 2. februar 1981-meersaq atuutilersinneqarpoq.

Inatsisartut peqqussutaat Kalaallit Nunaannut ministeriaqarfiup nunaminertanik atuinnermut inatsisaanut assingugajalluinnartoq aallaavigalugu oqartussaaffik siusinnerusukkut Kalaallit Nunaannut ministerip ataaniissimasoq Namminersornerullutik Oqartussanut nuunneqarpoq. Taamaalilluni Nuna tamakkerlugu pilersaarusionerermut ataatsimiititaliaq Inatsisartunit pilersinneqarpoq, aammalu illoqarfinnut pilersaarutit ilusissaannut imarisaannullu maleruagassat Namminersornerullutik Oqartussanit aalajangersarneqartussanngorlutik. Namminersornerullutik Oqartussat illuliornernut oqartussaanerermut malittarisassiorput, aalajangerneqarporlu Nuna tamakkerlugu pilersaarusionerermut ataatsimiititaliaq suliarfik pillugu ukiumoortumik Inatsisartunut nalunaarusiortassasut. Aammattaaq Nuna tamakkerlugu pilersaarusionerermut ataatsimiititaliap naammagittaalliuutini aalajangiineri inaarutaasumik aalajangiinerusalurput.

Inatsisartut inatsisaata piviusunngortinnissaanut Kalaallit Nunaanni illuliortiternermi oqartussaassuseq pillugu Namminersornerullutik Oqartussat nalunaarutaat nr. 4, 1. december 1982-meersaq atuutilersinneqarpoq, tassani aalajangersarneqarpoq Namminersornerullutik Oqartussat tassaasut illuliortiternermi oqartussaasut, Namminersornerullutillu Oqartussat sinnerlugit sumiiffinni oqartussaasut tassaasasut GTO, sumiiffinni GTO-p illuliortitsinernut sinniisaannit inuttaqartinneqartoq. Tamatuma nalaani illuliortiternerermut oqartussaaffik Kalaallit Nunaanni illuliortiternermi malittarisassat 1982-meersut, tassungalu atatillugu illuliortiternerermut malittarisassanut Namminersornerullutik Oqartussanit najoqqutassiarineqartut innersuussutillu tunngavigalugit ingerlanneqalerpoq.

1980'kkut qiteqqunneranni Kalaallit Nunaanni inuiaqatigiinni ineriartorerup aammalu qitiusumik sumiiffinnilu misilittakkat nassatarisaannik inatsisip 1977-miilli

allanngortinneqarsimangitsup annertuumik allanngortinneqarnissaa pisariaqartinneqalerpoq.

Taamaattumik 1986-imi Nunaminertat atorneqarnerat pilersaarusernerlu pillugit Inatsisartut peqqussutaat nr. 6, 19. december 1986-imeersoq atuutilersinneqarpoq. Peqqussutikkut nunaminertanut oqartussaassuseq inatsisitigut maleruagassinneqarpoq, illoqarfiup nunaqarfiullu killeqarfianni nunaminertanut oqartussaaffik kommuninit isumagineqartussanngorlugu, nunaannarmilu nunaminertanut oqartussaaffik Naalakkersuisunit isumagineqartussanngorlugu. Taamatuttaaq aalajangersarneqarpoq illoqarfinni nunaqarfinnilu kiisalu nunaannarmi nunaminertanik atuinissat akuersissummik peqqaarluni pisinnaasut.

Peqqussummi 1986-meersumi siunertaasut ilagaat pilersaarusernermut suliaasaqarfimmi aalajangiisinnaatitaaffiup sumiiffinnut siammartinneqarnissaanut suliap ingerlanera aallartinneqassasoq. Peqqussut naapertorlugu kommunalbestyrelsit kommunimut pilersaarusernermik ingerlatsisinnaallutillu ingerlatsisussaapput, taamaattorli atuutilersinneqarnissaanut Naalakkersuisunit akuersissuteqaqqaartussaallutik. Peqqussummi sumiiffinnut pilersaarusernermi maleruagassanik sukumiisunik aalajangersaanissamut aalajangiisinnaatitaaneq suliaqarpoq. Taamaaliornikkut kommuninut pilersaarusernerup kingusinnerusukkut aamma suliaqarpoqarnissaa siunertaralugu aallarniutitut alloriartoqarnissaa peqqussummi siunertarineqarpoq.

Pilersaarusernermi sukumiinerpaami, tassalu sumiiffinnut pilersaarusernermi, kommunini nunaminertanik ataasiakkaanik atuinissamut malittarisassat sukumiisut pisussaaffiliisullu aalajangersagaasarpot. Sumiiffinnut pilersaaruserneq, kommunimut pilersaarusernermut kommunalbestyrelsip kommunimi paasiuminarsakkamik siunissami nunaminertanut atuinissanut killissarititaasunik aalajangersaaffigisaanut, akerliusussaangilaq.

2003-imi Naalakkersuisut KANUKOKA suleqatigalugu ataatsimiititaliamik, pisortat suliaasaqarfiini suliaasanik isumaginninnissamut killissarititaasunik allannguuteqartitsinerne aalajangiinissamut tunngavissiisussamik teknikkikkut suliaasatigullu misissueqqissaarnernik suliaqartitsisussamik pilersitsippot. Aaqqissuussaannermut Isumalioqatigiissitap "Pisortat suliaasaqarfiinik aaqqissuusseqqinnissaq pillugu isumaliutissiisutaa" 2006-imi septembarimi tunniunneqarpoq. Aaqqissuussaannermut Isumalioqatigiissitap ilaatigut inassutigaa kommunimut pilersaarutit aamma sumiiffinnut pilersaarutit ataatsimoortillugit pilersaaruserneqartalissasut, peqatigisaanillu pilersaarutit taakkua akuersissutigineqartarnissaannut oqartussaaneq Namminersornerullutik Oqartussanit kommuninut nuunneqassasoq. Tamatuma saniatigut inassutigineqarpoq nunaannami nunaminertanut oqartussaaneq Namminersornerullutik Oqartussanit kommuninut nuunneqassasoq.

Tamanna tunngavigalugu Naalakkersuisut Aaqqissuussaannermut Isumalioqatigiissitap inassuteqaatai aallaavigalugit inatsisinik nutarnerinissaq aallartippaat.

2. Peqqussutissatut siunnersuutip imarisai pingaarnert

Aaqqissuussaannermut Isumalioqatigiissitap isumaliutissiisutaa naapertorlugu ineriartornissaq naatsorsuutigineqartoq eqqarsaatigalugu, tassalu suliaassarfiit arlaqartut Namminersornerullutik Oqartussanit kommuninut nussorneqarnissaannut tunngatillugu, Naalakkersuisut pilersaarusiornermut killissarititaasunik oqartussaasutut inissinneqarnissaat eqqortuusorineqarpoq. Tamatumuuna Naalagaaffiup aamma Namminersornerullutik Oqartussat kissaataat isumaallu najukkani aammalu qitiusumik pilersaarusiornermi ilanngunneqartarnissaat, peqatigisaanillu innuttaasunut pisussaaffiliisunik sukumiisumik maleruagassiisarnepup najukkami pisarnissaa qularnaarneqassaaq.

Taamaattumik siunnersuummi pingaarnertut anguniarneqarpoq, ullutsinnut tulluarnerusunik paasiuminarsakkanillu kommunimi qitiusumilu pilersaarusiornermut maleruagassaasinnaasunik sanaartorfissanik pilersaarusiornermut eqaatsumik inatsisitigut sinaakkusiinissaq.

Peqatigisaanik kommunit kommuneqarfimmut tamarmut sanaartorfissanik pilersaarusiornissamut aalajangiisinnaatitaanerannut killissarititaasussanik aalajangersaaffiusumik inatsisitigut sinaakkusiisoqarnissaa kissaatigineqarpoq. Inatsimmi aamma Namminersornerullutik Oqartussat oqartussaasuini, kommunalbestyrelsini aammalu pisortat suliaassarfiinut pilersaarusiornermut oqartussaasuni pilersaarusiortartut akornanni suleqatigiinnerannut killissarititaasussanik aalajangersaaviussaaq. Innuttaasut pilersaarusiornermut sunniuteqaqataasinnaanerat tunngavissatut pingaaruteqartutut atuutsiinnarneqassaaq.

Nuna tamakkerlugu pilersaarusiorneq

Peqqussummi nuna tamakkerlugu annertuumik pilersaarusiorneq ingerlaavartooq aalajangersaavigineqarpoq. Nuna tamakkerlugu pilersaarusiornermi tassani ilaatigut ataqatigiissumik sanaartorfissanik aningaasatigullu pilersaarusiorsinnaalernissaq ilaatigullu kommunimut pilersaarusiortarnermut atatillugu piginnaatitaaffiit sumiiffinnut siammartinneqarnissaannut pilersaarusiortarnermut pisariaqartunik tunngavissaqalersitsinissaq siunertarineqarput.

Sanaartorfissanik nunaminertanik pilersaarusiornepup ingiaqatigisaanik inuiaqatigiinni sulianut assigiinngitsunut pilersaarusiortoqartarpoq, tassalu suliaassarfinnut pilersaarusiornermik taaneqartarpoq. Tassunga atatillugu suliaassarfinnut pilersaarusiornepup nuna tamakkerlugu nunaminertanik atuinnermut atatillugu kingunerisassaannik nalilersuineq nuna tamakkerlugu pilersaarusiortarnermi suliaassaavoq.

Naalakkersuisut G50-imut imaluunniit G60-imut assigusumik ataatsimoortumik, ataqatigiissaarisumik nuna tamakkerlugu pilersaarusiortarnissaat siunertaanngilaq. Kisiannili oqaaseq "Nuna tamakkerlugu pilersaarusiorneq" sanaartornermut inatsisinut, inatsisit allat naapertorlugit sumiiffinnut aalajangersimasanut immikkut piumasaqaatalinnut imaluunniit nunat tamalaat akornanni isumaqatigiissutinut

ataatsimoortumik taaguutitut atorneqarpoq. Tamatumunnga assersuutigalugu taaneqarsinnaapput qaartartuusivinnut, sumiiffinni imeqarfinnut, timmisartunut suluusalinnut mittarfinnut qulimiguulinnullu mittarfinnut atatillugu sumiiffinnut akornuteqanngitsumik miffissanut, pinngortitamik kulturikkullu eqqissimatitsivinnut, RAMSAR-eqarfinnut il.il. immikkut ittumik killeqarfiutitat.

Tamatuma saniatigut Namminersornerullutik Oqartussat suliassaqaqarfinnut pilersaarutaat, suliassaqaqarfinni assigiinngitsuni nunap iluani immikkut soqutinaatilinnik nassuiaasut nuna tamakkerlugu pilersaarusiordermi aamma pineqartunut ilaapput, ilanngullugit assersuutigalugu umiarsualivinnut pilersaarutitut imaluunniit timmisartunut suluusalinnut mittarfinnut pilersaarutitut atatillugu nunaminertanik atuinnermut imaluunniit nunaminertanik inniminniinernik maleruagassiineq.

Nuna tamakkerlugu pilersaarusiordermi immikkoortunut siuliani taaneqartunut kommunit ataatsimoortumik paasiuminarsaaviginiarlugit, Naalakkersuisut Namminersornerullutik Oqartussat suliassaqaqarfiinut assigiinngitsunut soqutiginaatilinnut siuliani taaneqartunut ataatsimoortumik takussutissiamik suliaqassapput. Nuna tamakkerlugu pilersaarusiordermut tunngatillugu soqutiginaatillit taakku ajornanngippat assiliannorlugit takussutissiaralugit nunami sumiiffinnut paasissutissiiffimmi nuna tamakkerlugu qarasaasiakkut pilersaarusiorder isaaffimmut (NunaGIS) ilanngunneqassapput.

Tassunga atatillugu peqqussutissatut siunnersuummi missiliummi tusarniaassutigineqartumi § 12-ip peerneqarnissaa naleqqutsinneqarpoq. Aalajangersakkami aalajangersarneqarpoq *"Kommunalbestyrelsi nuna tamakkerlugu pilersaarusiordermut peqataassaaq kommunip isorartussusianut tamarmut kommunimi piffiit immikkoortutigit isumalluutit, isumalluutit pinngortitamit pisut, aningaasaqarnikkut isumalluutit, taakku tamarmik nalilersornerat, innuttaassuseqarnikkut aamma inuussutissarsiordernikkut ineriartorder anguniakkat aammalu pisortat suliarinnittoqarfiini pilersaarusiorderit toqqammavigalugit pilersaarusiordermik naammassisaqarnikkut."* Nuna tamakkerlugu pilersaarusiordermut atatillugu paasissutissanik saqqummiussisussaatitaaneq peqqussummi § 4-imi takuneqarsinnaavoq aammalu kommunimut pilersaarusiordermissamut pisussaaffeqarneq § 13-imi takuneqarsinnaalluni.

Aalajangersakkami siuliani taaneqartumi (§ 12) tunngaviuvoq, tamatuma akerlianik nuna tamakkerlugu pilersaarusiorder ataqatigiissaagaq, G50-imut imaluunniit G60-imut assersuunneqarsinnaasumik akulerutsitsisumik tamakkiisumik pilersaarusiordermut taaneqarsinnaanerusoq. Taamaattumik aalajangersagaq taamatut pilersaarusiordermut siunnerfeqartumut eqqaasitsiinnartussatut paasineqartariaqarpoq, taamaattumillu peqqussummi kingullermik suliarineqartumi peerneqarluni.

Kommuninut pilersaarutitut aalajangiisinnatitaaneq

Nassuiaatit peqqussummut 1986-imeersumut nassuiaatitut aammalu Iluarsaaqqinnermut Isumalioqatigiissitap inassuteqataannut tulluarterinnerisigut,

kommunimut pilersaarusiortarneq pillugu aalajangiisinnaatitaanerup sumiiffinnut siammartinneqarnissaa siunnersuutigineqarpoq. Taamaalilluni nuna tamakkerlugu pilersaarusiortarnermut aalajangiisarnermut killissarititaasut iluanni kommunit namminersorsinnaanissaat annertuumik siunnersuutigineqarpoq. Siunnersuummi kommuninut pilersaarusiornerni aalajangiisinnaatitaaneq kommunalbestyrelsiniissasoq taamaalilluni siunnersuutigineqarpoq.

Kommuninut pilersaarutit akuersissutigineqartarnissaannut aalajangiisinnaatitaanerup sumiiffinnut siammartinneqarnissaa Namminersornerullutik Oqartussat periarfissaannut, nunamut tamarmut ataatsimut isigalugu nuna tamakkerlugu pilersaarusiortarnermut soqutiginaatilinnik qulakkeerisinnaasunut, oqimaaqatigiisneqartariaqarpoq. Taamaattumik Namminersornerullutik Oqartussat suliani inuiaqatigiinnut pingaarutilittut suussusersineqarsinnaasuni akuliussinnaanissaat pisariaqarpoq. Kommunimut pilersaarutitut aalajangiisinnaatitaanermik annikillisisineq taamaattoq Namminersornerullutik Oqartussat inatsisitigut imaluunniit nuna tamakkerlugu pilersaarusiornermut malitassiani kommunimut pilersaarusiortarnissanut sinaakkutissanik aalajangersaaneratigut pisinnaavoq. Imaluunniit Namminersornerullutik Oqartussat kommunimi pilersaarusiortartut erseqqinnerusumik qanoq imaqarnissaanik piunasaqarlutik pilersaarusioqqusinnaavaat imaluunniit kommunimut pilersaarusiornermut oqartussaaffik tigusinnaallugu. Kommunimut pilersaarusiornermut oqartussaaneq taamaallaat atorunnaarsinneqarsinnaavoq tamanna ataatsimut isigalugu inuiaqatigiinni pingaartitassat isumagineqarnissaannik tunngavilersuutitaqarpat.

Pilersaarusiart assigiinngitsunik inissisimaffillit kattutsinnerat

Ataatsimut isigalugu kommunimut pilersaarusiornermut aammalu kommunimi sumiiffinnut sukumiisumik pilersaarusiornermut agguataarisimanerit pisariaqanngitsut allaffissornikkullu pisarissersuutaasut paasinarsisimavoq. Tamanna pissuteqarpoq nutaamik illuliortoqarniartillugu sumiiffimmuut kalluarneqartumut kommunimut pilersaarummut tapiliussaq, sumiiffimmullu pilersaarusiaq nutaaq suliarineqartariaqartarmata. Taamaalillutik kommunit pilersaarutissatut siunnersuutit immikkoortut marluk tamaasa immikkut suliarisariaqartarsimavaat, tamarmik assigiimmik imallit, taamaallaallu sukumiissutsimikkut assigiinngissuteqartut.

Nunaminertat pillugit peqqussutissatut siunnersuummi kommuninut sumiiffinnullu pilersaarusiorneq ataasiinnannngortinniarneqarpoq, taamaalilluni siunissami sumiiffimmuut aalajangersimasumut kommunip pilersaarutaani toqqaannartumik aalajangersakkanik sukumiisumik maleruagassiuussisoqarsinnaalissalluni.

Pilersaarusiorneq aamma nunaminertat atorneqarnerat pillugit Inatsisartut peqqussutissaattut nutaatut siunnersuutip atuutilernerani pilersaarusioriaaseq ataasiinnaq atuutilersinneqassaaq. Kommunini pilersaarusioriaatsimi atuuttumi kommunimut pilersaarutit aamma sumiiffinnut pilersaarutit atorneqarput, taakkualu illoqarfiup ilaanut pilersaarutitut, asimut pilersaarutitut aamma nunaqarfinnut pilersaarutitut ataatsimoortumik taaguutaapput. Akerlianik siunissami kommunimi pilersaarusiortarnermi pilersaarusioriaaseq ataasiinnangussaaq, tassaassalluni

kommunimut pilersaarut. Sumiiffinnut pilersaarutit pillugit maannamut sukumiisunik maleruagassaasartut siunissami sumiiffiup ilaanut aalajangersimasumut ataatsimut aalajangersakkani, kommunimut pilersaarummi aalajangersakkanut immikkoortumut ilaasuni aalajangersarneqarsinnaassapput.

Ataatsimut isigalugu pilersaaruserioriaatsimi atuutilersussami tamatumuuna pilersaarutit pingasunik inissisimaffeqartut aalajangersaavigineqartalissapput: Nuna tamakkerlugu pilersaarummi, kommunimut pilersaarummi aammalu nunaminertanik atugassiisarnermi.

Pilersaarutit suliarineqarnissaannut periaaseq

Sumiiffinnut pilersaarutit, kommunimut pilersaarutit nunaannarmullu pilersaarutit suliarineqarneranni periaatsit assigiinngissuteqarsimapput, tassa kommunimut pilersaarutit nunaannarmullu pilersaarutit Naalackersuisunit akuerineqartarnerat ingerlaannarsimallunni, tamanna sumiiffinnut pilersaarutit sinnerinut (najukkanut pilersaarutit) piumasqaataasimanani. Peqqussummi nutaami kommunimut pilersaarutinut tamanut aalajangiisinnaatitaaneq kommunimut tunniunneqassasoq siunnersuutigineqarmat, tamatumani periaatsini assigiissaarinissaq periarfissinneqarpoq taamatullu inuttaasunut pisortanullu oqartussanut paasiuminarnerulersinneqassallutik.

Kommunimut pilersaaruseriorneq nuna tamakkerlugu pilersaaruseriornermut, ataatsimut isigalugu nuna tamakkerlugu nunaminertat atorneqarnissaannut aalajangiisuusumut aammattaarlu Namminersornerullutik Oqartussat suliaasaqarfinnut pilersaaruseriornerannut ataqatigiisitsinissamik kiisalu aningaasatigut pilersaaruseriornermut pingaarnertut tunngaviusunik imaqartumut, akerliusussaannngilaq.

Nunaannarmi nunaminertanut aalajangiisinnaatitaaneq

Nunaannarmi nunaminertanut atugassiinermut aalajangiisinnaatitaanerup kommuninut tunniunneqarnissaa naatsorsuutigineqarpoq. Tamatumunnga patsisaavoq kommunit namminersornerannik nukittorsaanissaq siunertaammat aammalu nunaannarmi sumiiffiit inuusutissarsiornermik mernguersarnissanullu siunertaqartunik sanaartorfigineqartarneri annertusiartormat. Kommunini ataasiakkaani nunap illoqarfiullu ataqatigiisarneqarnerat kiisalu qitiusumik aqutsisoqarfiup nunami nakkutilliinissaminut periarfissaluttarnera nunaminertanut oqartussaaffiup tunniunneqarnissaanut qanillattuisitsipput, tassungalu peqatigitillugu Naalackersuisut nuna tamakkerlugu pilersaaruseriornermut pingaarnertut malittarisassiaasigut, ataatsimut isigalugu Naalackersuisunut soqutiginaatillit, nunaannarmi sumiiffinnut assigiinngitsunut killissarititaasunut aalajangersaganngorlugit aalajangersarneqarput.

Nunaminertanut oqartussaaffiup tunniunneqarneranut atatillugu kommunit nunaannarmut pilersaaruseriornerissamik pisussaaffilerneqarput.

Siunnersuut naapertorlugu Naalakkersuisut nalunaarutitigut il.il. anguniakkanut siunertanullu naapertuuttumik aalajangersaanissaminut piginnaatitaaffilerneqarput.

Peqqussutissatut siunnersuummi inatsisitigut inissisimaffik maannamut atuussimasoq atuutsiinnarneqarpoq, tamatuma kinguneranik nunaminertanik atuissagaanni akuersissummik peqartoqartariaqarluni. Tusarniaanermut atatillugu peqqussummi § 26-imi nunaminertanik atuinissamut akuersissutit pillugit imm. 4 nutaaq ilanngunneqarpoq. Aalajangersakkami aalajangersarneqarpoq nunaminertat pisinermi tunisinermilu niuerutigineqarsinnaanngitsut, tamannalu suleriaatsimik atuuttumik maleruagassanngortitsineruvoq. Nunaminertami aalaakkaasumik nalilimmik sanasoqarsimappat, taanna aalaakkaasup nalinga pisinermi tunisinermilu akigineqarsinnaavoq, taamaalilluni piginnittoq nunaminertamut atuisinnaanermut siullertut piginnaatitaaffeqalissalluni.

Inatsisartut peqqussutissaattut siunnersuummi sumiiffik aalajangersimasoq taaneqanngilaq. Nalinginnaasumik maleruagassat naapertorlugit illuatungiliisunik malitassaqtartinnagu Kalaallit Nunaata nunataanut imartaanullu inatsisit atuutissapput. Nunavimmut tunngavik pillugu inatsimmi § 6 naapertorlugu Kalaallit Nunaata nunavimmut tunngavianut atasortaani sanaartornernut Inatsisartut peqqussutissaattut siunnersuut aammattaaq atuutissaaq.

Inatsimmi piginnaatitsissummi aalajangersakkat (Areaalit (nunaminertat/imartat) atorneqarnerat, illoqarfiit allilernerqarneri sanaartorfigineqarnerilu pillugit Kalaallit Nunaannut Inatsit nr. 612, 23. december 1980-imeersoq, § 2) naapertorlugit peqqussut pisuussutinik uummaatsunik misissueqqaarnermut, ujarlernermut imaluunniit piiaanermut atuutinngilaq. Pisortat suliffeqarfiutaasa aamma suliffeqarfiit namminersortut suliaat, ilanngullugit Kalaallit Nunaanni aatsitassanik misissueqqaarnermut, aatsitassanik ujarlernermut aammalu aatsitassanik piiaanermut atatillugu nunaminertanik atuneq, piginnaatitsissummik tunniussinermi imaluunniit suliaasaqarfimmi aningaasaliissuteqarnermi inatsimmut tunngaviusumut naapertuuttumik inatsisitigut maleruagassinneqassapput.

Malittarisassani ilaatitsinnginnermi erngup nukinganik isumalluutissanut tunngasut, erngup nukinganik isumalluutissat pillugit Kalaallit Nunaannut inatsit 22. decembari 1993-imeersukkut (Inatsit nr. 1075) ullumikkut Namminersornerullutik Oqartussanit oqartussaaffigineqartut pineqanngillat.

Kiisalu siunnersuutip atuutilerneratigut peqqussut naapertorlugu aalajangiinernut atatillugu immikkut naammagittaalliuuteqartarfik pilersinneqassaaq. Taamatut aalajangersaanermi siunertarineqarpoq inatsisiliortut inatsisinillu atortitsisut avissaartinneqarnissaat. Maannamut aaqqissuussinermut – naammagittaalliuutit Naalakkersuisunut ingerlanneqartarnerannut – naleqqiullugu, naammagittaalliuuteqartarfimmik pilersitsinikkut inuttaasut inatsisitigut illersorneqarnerat nukittorsarneqassaaq.

Tusarniaanermut suleriaatsimut atatillugu, kommunalbestyrelsip aalajangiinerisa naammagittaalliuutigineqarsinnaanerat pillugu peqqussutissatut siunnersuummi aalajangersagaq erseqqissarneqarpoq, taamaalilluni erseqqissarneqarluni

naammagittaalliuutitut *aalajangiisartut* pineqartut. Peqqussut tusarniaassutigineqartoq immikkoortumi tassani assigiissaariffigineqarsimanngilaq.

Aammattaaq tamatumunnga aalajangersakkamut nassuiaatini ilanngunneqarpoq, annertuumik inatsisinik unioqqutitsisoqarsimanera ilimanaateqartoq naliliisoqarpat aatsaat, pissutsit kinguartitsinermik sunniuteqartinneqarsinnaasut.

3. Pisortanut aningaasatigut allaffissornikkullu sunniutissat

Kommuninut aningaasatigut allaffissornikkullu sunniutissat

Avatangiisinut Aqutsisoqarfik isumaqarpoq, peqqussut manna naapertorlugu kommunimi pilersaarusiortarnermi aamma nunaminertanik ingerlatsinermi isumalluutissanik pisariaqartitsineq, ullumikkut kommunimut pilersaarusiortarnermut, sumiiffinnut pilersaarusiortarnermut kiisalu illoqarfiup ilaanut pilersaarusiortarnermut aningaasaliissuteqartussaannermut naleqqiullugu annertunerulissanngitsoq.

Maleruagassat pioreersut pisariillisarneqaraluartut, pilersaarusiortarnermi periaasissat kommuninullu pilersaarusiortarnermut pillugit maleruagassat nutaat atuutilerneranni immikkoortut ilaanni kommunit suliassaqaqarnerulissapput. Aammattaaq naatsorsuutigineqarpoq nunaannarmi nunaminertanik oqartussaaffiup pilersaarusiortarnermut pisussaaffiup tunniunneqarnerani suliassaqaqarfimmi kommunit suliassaqaqarnerulaalissasut.

Pilersaarusiortarnermi pisariillisagaasup atuutilerneratigut paasiuminarnerulernissaata saniatigut naatsorsuutigineqarpoq, kommuninik iluarsaaqqinnerup atuutilernerata kingorna pitsaassutsip qaffasinnerulernera kommunit pilersaarusiortarnerannut oqartussaasut ataatsimut isigalugu misigissagaat, tamanna kommunit pilersaarusiortarnerannut oqartussaaffiup qitiusumut inissinneqarneratigut pigaluarpat aamma/imaluunniit pilersaarusiortarnermi sakkussanik assigiissarinikkut aamma qarasaasiaq atorlugu sumiiffimmi pilersaarusiortarnermik ataatsimut isigalugu nukittorsaasoqarneratigut pigaluarpat. Pilersaarusiortarnermut nalunaarsuutip NunaGIS-ip, nunaminertamut pineqartumut pilersaarusiortarnermut tunngaviumik atuuttumik paasiuminarnerulersitsisussap pilersinneqarnerata saniatigut, sumiiffiit ilaanni aalajangersimasuni killiliinernut nunap assingini saqqummersitsinissamik nalunaarsuinissamillu ajornarunnaarsitsisussamik nunami sumiiffinnut tamanut paasissutissanik katersuiffimmi elektronik atorlugu programmiliinissaq Avatangiisinut Aqutsisoqarfiup naatsorsuutigaa. Tamatuma saniatigut sumiiffiup ilaani aalajangersimasuni ataatsimi kommunimut pilersaarummut tapiliussassamik suliqaqarnermi allaffissiamik pilersitsinissaq ajornanngilaq, tamatumuuna kommunini sulineq oqilisaaffigineqassalluni. Suliniutit siuliani taaneqartut nuna tamakkerlugu pilersaarusiortarnermut kontomit ("2008-imut Inatsisartut aningaasanut inatsisaat"-ini konto 33.01.02 "Nuna tamakkerlugu pilersaarusiortarnermut") aningaasalersorneqarnerissaat naatsorsuutigineqarpoq.

Nunaannarmi nunaminertanut oqartussaaffiup Naalakkersuisuniit kommuninut tunniunneqarneratigut nunaannarmi nakkutilliisussaataaneq aamma kommuninut

tunniunneqassaaq. Tassunga atatillugu oqaatigisariaqarpoq nunaannarmi nakkutilliineq ullumikkut aningaasalersorneqanngimmat.

Ataatsimut isigalugu naatsorsuutigineqarpoq kommunit pilersaarusionerannut aamma nunaminertanik aqutsinerannut piumasaqaatit allannguuteqarnerat kommunini sumiiffinnillu pilersaarusionerit kattunneqarnerisigut pilersaarusionerup pisariillisaavigineqarnera suliassakillisitsissasoq. Taamatut naatsorsuuteqarnermut tunngaviuvoq, kommuninut iluarsaaqqinnermi atuutilersussami kommuninut pilersaarusionerit ataatsimoortinneqarnissaat naatsorsuutigineqarmat.

Isumalluutissat siunertamut atugassiisutigineqartussat qanorpiaq annertunerulernissaannut kommuni aalajangiisuusaaq, ataatsimoortumilli tapiissutip annertusineqarnissaannut apeqqut Namminersornerullutik Oqartussat kommunillu akornanni ataatsimoortumik tapiissutit pillugit isumaqatigiinniarnissani ilaatinneqartariaqassaaq.

Namminersornerullutik Oqartussanut aningaasatigut allaffissornikkullu kingunerisassat

Nunap karsianut aningaasatigut kingunerisassat eqqarsaatigalugit nuna tamakkerlugu pilersaarusionerermut tunngasortaa, tassalu suliassaqarfinnut pilersaarusionerit assigiinngitsut eqqarsaatigalugit, maannamut missingersuutit iluaniinnissaat naatsorsuutigineqarpoq, nuna tamakkerlugu pilersaarusionerermut kontomit ("2008-mut Inatsisartut aningaasanut inatsisaat"-ni konto 33.01.02 "Nuna tamakkerlugu pilersaarusionerit"), kiisalu pilersaarusionerermut inatsisinik aqqissuusseqqinnikkut inuit ukiumut suliarisinnaasaasa naatsorsornerisa ilanngunneqartarunnaarnerisigut aningaasalersorneqarlutik. Taamatuttaaq Naalakkersuisut naatsorsuutigat Pilersaarusionerermut nunaminertanullu naammagittaalliuuteqartarfiup pilersinneqarnera aningaasaliissutaareersut iluanni aningaasalersorneqarsinnaassasoq, tassani naatsorsuutigineqarpoq inuit ukiup affaani suliarisinnaasaattut annertussusilimmik aningaasartaliinikkut tassunga nuunneqarsinnaassasut.

Naammagittaalliuutinut suliarinninneq ullumikkut Avatangiisinut Aqutsisoqarfiup kontoanit pingaarnemit aningaasalersorneqartarpoq (konto 75.01.01). Missiliorneqarpoq naammagittaalliuutinik suliarinninnermut ukiup affaani sulisoq ataaseq Avatangiisinut Aqutsisoqarfiup ukiut tamaasa atortaraa. Suliassap taassuma naammassinissaanut ukiut tamaasa 200.000 koruunit aningaasartuutigineqartartut missiliorneqarpoq. Tamatuma saniatigut pilersaarusionerermut nunaminertanullu naammagittaalliuuteqartarfimmi ilaasortanut ukiumut 50.000 koruunit missingersuusiarineqarput. Tassunga atatillugu siunnersuutigineqarpoq pilersaarusionerermut nunaminertanullu naammagittaalliuuteqartarfik naammagittaalliuuteqartarfinnut allanut, assersuutigalugu Pinngortitaq pillugu naammagittaalliuuteqartarfimmut, Ineqarneq pillugu naammagittaalliuuteqartarfimmut imaluunniit Avatangiisit pillugit naammagittaalliuuteqartarfimmut kattutsinneqassasoq.

Pilersaarusionermut nunaminertanullu naammagittaalliuuteqartarfiup suliassaasa naalackersuinermit tunngasut isumagineqarnissaat, maannakkut missingersuutini aningaasaliissutitut killiliussat iluanni kontomit pingaarnermi 75.01.01-imit aningaasaliissutit taamaaqataannik nuussinikkut aningaasalersorneqassaaq.

4. Inuussutissarsionermut il.il. aningaasatigut allaffissornikkullu kingunerisassat.

Siunnersuut inuussutissarsiutitut il.il. aningaasatigut sunniuteqassagatinneqanngilaq.

Ataatsimut isigalugu siunnersuutip matuma atuutilernerani kommuninut pilersaarutit aamma kommuninut pilersaarutitut tapiliussat suliarineqarnerinut piffissap annikillinissaa naatsorsuutigineqarpoq. Tamatumunnga pissutaavoq suliassat taakku siunissami Naalackersuisunit akuerineqartarnissaat piumasqaataajunnaartussaammat.

Ullumikkut illuliortiternerit sanaartorerillu aatsaat sumiiffimmut pilersaarummut atuuttumut naapertuuttumik nunaminertamik atuinissamik akuersissummik tunniussisoqarsimappat aallartinneqarsinnaapput. Illoqarfiup ilaanut pilersaarut, kommunimut pilersaarummi sumiiffimmut pineqartumut killiliussanut aalajangersakkanut naapertuuttussaavoq.

Tassunga atatillugu akuttunngitsumik kommunalbestyrelsi sumiiffimmut nutaamik illoqarfiup ilaanut pilersaarummik aamma kommunimut pilersaarummut tapiliussamik suliaqartariaqartarpoq. Taamaattoqartillugu illoqarfiup ilaanut pilersaarutissatut siunnersuut utaqqiisaasumik inatsisitigut sunniuteqartinneqarsinnaanngilaq, pissutigalugu tamatumuuna siullermik kommunalbestyrelsimiit Naalackersuisut kommunimut pilersaarummut tapiliussamik akuersissuteqarnissaat sioqqunneqartussaassammat aappassaannillu taamatut periaaseqarneq kommunalbestyrelsip kommunimut pilersaarummik piviusunngortitsinissamik pissusaaffeqarnerat pillugu aalajangersakkamut (nunaminertat atornerqartarnerat pilersaarusionerfigineqartarnerallu pillugit Namminersornerullutik Oqartussat nalunarutaat nr. 23, 18. november 1992-imeersumi § 10) akerliussammat. Tamatuma kingunerisaanik illoqarfiup ilaanut pilersaarut akuttunngitsumik utaqqiisaasumik inatsisitigut sunniuteqartinneqarsinnaasarsimangilaq aammalu sanaartorerimi Naalackersuisut kommunimut pilersaarummut tapiliussamik akuersissuteqarnissaat utaqqineqartariaqartarsimalluni.

Peqqussutissat nutaatut siunnersuutip atuutilerneratigut kommunimut pilersaarutit aamma kommunimut pilersaarutitut tapiliussat siunissami Naalackersuisunit akuersissutigineqartarunnaartussaassapput. Aammattaaq kommunimut pilersaarutissatut aamma kommunimut pilersaarummut tapiliussassatut siunnersuutit utaqqiisaasumik inatsisitigut sunniuteqartinneqarsinnaalissapput. Tamanna tunngavigalugu naatsorsuutigineqartariaqarpoq maannakkornit illuliortiternerit sanaartorerillu ataatsimut isigalugu piaarnerusumik aallartinneqarsinnaalissasut.

5. Avatangiisinut pinngortitamullu kingunerisassat

Peqqussutissatut siunnersuut avatangiisinut pinngortitamullu sunniuteqassagatinneqanngilaq.

Peqqussutissatut siunnersuut nunaminertanik atuinissamut imminermini pinngortitamut imaluunniit avatangiisinut tunngasunik killilersuinernik imaqqanngilaq. Nuna tamakkerlugu pilersaarusiorneq taamatullu kommunimi pilersaarusiorneq killilersuinernik assigiinngitsunik imaqqartassagaluartut, taakkua suliaasaqarfinnut inatsisini inatsisitigut maleruagassaqqartinneqarput. Assersuutigalugu immikkut mingutsitsisumik suliaqarnissamut aalajangersakkat, avatangiisit illersorneqarnissaat pillugu inatsimmi inatsisitigut maleruagassaqqartinneqarpoq.

Nunaannarmi nunaminertanut pilersaarusiornermullu aalajangiisinnaatitaanerup Namminersornerullutik Oqartussanit kommuninut tunniunneqarnerani, nunaminertat atornerarneranni atuinermi pissusiviusunik annertunerusumik allannguuteqartoqarnissaa naatsorsuutigineqanngilaq. Taamaalilluni peqqussutissatut siunnersuutip, pingaartumik pilersaarutinik nunaminertanillu aqutsinerup ingerlanneqarneranut sunniuteqarnissaa, kisiannili taassuma piviusunnngortinneqarnerani sunniuteqannginnissaa naatsorsuutigineqarpoq.

6. Innuttaasunut allaffissornikkut kingunerisassat

Naatsorsuutigineqarpoq siunnersuummi matumani innuttaasut pilersaarummut oqalliseqataanissamut akuutinneqarnissaasa allannguuteqannginnissaa qulakkeerneqartoq.

Qanittumi inissisimanissamik tunngaviumut naapertuuttumik, peqqussutissatut siunnersuutip atuutilerneratigut, aalajangiinerit innuttaasumut tunngassuteqartut amerlanerusut, siunissami innuttaasunut ataasiakkaanut qaninnerusumiittumi isummerfigineqartalissapput. Tamanna atuutissaaq kommunimut pilersaarutit akuersissutigineqarnerannut atatillugu taamatullu nunaannarmi nunaminertanik atugassiinerit pillugit aalajangiinernut atatillugu.

Naatsorsuutigineqarpoq innuttaasut aqutsinerumut akerliliissuteqarnissaannut periarfissaat ataatsimut isigalugu pitsaanerulissasoq. Tamanna atuutissaaq nunaannarmi nunaminertanik atugassiinerit pillugit kommunit aalajangiineri pillugit apeqqutinut tunngatillugu, siusinnerusukkut nunaminertanik atuneq aamma pilersaarusiorneq pillugit Inatsisartut peqqussutaat nr. 6, 19. december 1986-imeersumi § 21 naapertorlugu allaffissornikkut oqartussanut allanut naammagittaalliuutigineqarsinnaasimangitsumi. Tamatumunnga pissutaavoq siusinnerusukkut Naalakkersuisut illoqarfiit nunaqarfiillu killeqarfiisa avataanni nunaminertanut oqartussaasuusimammata.

7. Naalagaaffeqatigiinnermut namminersornermullu tunngatillugu

Peqqussutissatut siunnersuut Naalagaaffeqatigiinnermut namminersornermullu sunniuteqassagatinneqanngilaq.

8. Oqartussaasut kattuffillu il.il. tusarniaavigineqarnerat

Peqqussummut siunnersuut piffissami 17.03.08-miit 28.04 2008-mut ukununga tusarniaassutigineqarpoq: Rigsombudi, Aningaasaqarnermut Nunanullu allanut Naalakkersuisoqarfik, Kulturimut, Ilinniartitaanermut, Ilisimatusarnermut Ilageeqarnermullu Naalakkersuisoqarfik, Ilaqutariinnermut Peqqissutsimullu Naalakkersuisoqarfik, Inuussutissarsiornermut, Suliffeqarnermut Inuutissarsiutitigullu Ilinniartitaanernut Naalakkersuisoqarfik, Attaveqarnermut Avatangiisinullu Naalakkersuisoqarfik (Sanaartornermut oqartussaasut), Aalisarnermut, Piniarnermut Nunalerinnermullu Naalakkersuisoqarfik, Naalakkersuisut siulittaasuata Naalakkersuisoqarfia, Aatsitassanut Ikummatissanullu Pisortaqarfik, KANUKOKA, kommunit, Nukissiorfiit, Royal Arctic Line A/S, Tele-Post, Mittarfeqarfiit, ASIAQ, Pinngortitaleriffik, Nunatta Katersugaasivia Allagaateqarfialu, Kalaallit Nunaanni politimesteri, Niels Bennetzens Tegnestue, Tegnestuen Nuuk, Masanti A/A, Niras Greenland A/S, Cowi A/S.

Kiisalu Attaveqarnermut Avatangiisinullu Naalakkersuisoqarfiup, Nordisk Ministerrådimi suleqateqarnerminut uiggiullugu, peqqussutip nutaap imarisaa ilusaalu Miljøministeriaqarfiup By- og Landskabsstyrelsiata sulisuinik eqqartueqateqarsimavoq taamatuttaaq inuit ataasiakkaat Kalaallit Nunaanni sanaartorfissanik pilersaarusiornernut ilisimasaqartut oqaloqatigineqarsimallutik.

Allanngortiterineq

Peqqussutissatut siunnersuummut tusarniaassutigineqartumut naleqqiullugu missingiutip matuma allanngortiterineqarnissaa Naalakkersuisoqarfiup qinersimavaa. Allanngortiterineq arlalinnik pissuteqarpoq. Allanngortiterinnermut pissutaasoq pingaarneq tassaavoq Naalakkersuisoqarfimmit Namminersornerullutik Oqartussani maleruagassanik suliaqarnermut malittarisassat, juni 2004-imeersut, eqqumaffigineqaaqsimammata, taakkua malillugit nalunaarutit aallaaviatigut aalajangersakkanik innuttaasunut saaffiginnittunik taamaallaat imaqartussaammata. Tamanna peqqussutissatut siunnersuummi aalajangersakkanik suliaqarnermi malinneqarsimanngitsoq nalilerneqarpoq.

Peqqussutissatut siunnersuummi aalajangersakkat amerlanersaat imarisamikkut aalajangersakkanik ullumikkut nunaminertanut peqqussummi aamma nalunaarummi atuuttumi aalajangersagaasunik ingerlatitseqqinnerupput. Tamanna pivoq aalajangersakkat oqaasertaliorneqarneri tamatigut assigiimmik oqaasertaqartinnagit, tamatumuunala aalajangersakkat taakku pineqartut assigiinngitsumik nassuiarneqarsinnaalersinneqarput.

Allannguutit suliarineqarput, taamaalilluni aalajangersakkat aamma suleriaatsit pingaarnerit maannakkut Inatsisartut peqqussutaanni takuneqarsinnaalerlutik aammalu innuttaasunut sukumiinerusumik maleruagassiinerit nalunaarummi immikkut aalajangersarneqarnissaat naatsorsuutigineqarluni.

Allanngortiterinerup kiisalu tusarniaanermi akissuteqaatit tiguneqartut malitsigisaannik allannguuteqartitsineq tunngavigalugu, peqqussutissatut siunnersuutissatut missingiut iluarsaassaasoq piffissami 18. juni 2008-imiit 22. juli 2008-imi nutaamik tusarniaassutigineqarpoq. tassunga atatillugu Inuussutissarsiornermut, Suliffeqarnermut Inuutissarsiutitigullu Ilinniartitaanernut Aqutsisoqarfik, Kulturimut, Ilinniartitaanermut, Ilisimatusarnermut Ilageeqarnermullu Naalakkersuisoqarfik, Aatsitassanut Ikummatissanullu Pisortaqaarfik, KANUKOKA aamma Royal Arctic Line A/S, tusarniaanermut akissuteqarput.

Tusarniaaneq makkuninnga allannguuteqartitsinissamik pissutissaqalersitsivoq:

1. Nuup Kommunea, Ilulissat Kommunea, COWI aamma Niras Greenland oqaatsip "bosted" (najugaqarfiup) atorneqarneranut akerliliissuteqarput. Akerliliissuteqarnermi ilaatigut pineqarpoq oqaaseq "bosted" allanittaaq aalajangersimasunik isumaqarmat.

Siunnersuut allanngortinneqarpoq, taamaalilluni "illoqarfik/nunaqarfik", taakkualuunniit assigisaat atorneqalerluni. Ataatsimoortumik taaguuteqartitsinissamut kissaateqarnerup tunngavigaa, kalaallisut oqaaseq "najugaqarfik" atorumaneqaraluarimat, kommunerujussuit atuutilerneranni 'illoqarfiit' 'nunaqarfiillu' immikkut isigineqarunnaarnissaat anguniarneqarluni. Taaguutip 'najugaqarfik' qallunaatuunngortinnera tassaavoq 'bosted', taamaattumillu taaguut taanna toqqarneqarsimavoq, kisiannili qallunaatut 'najugaqarfeqarneq' pillugu allatut taaguuteqanngimmat taarsiullugu taaguutit 'illoqarfik/nunaqarfik' atorneqassapput, naak tamatumuuna illoqarfiup nunaqarfiullu assigiinngissutaat atorunnaavinneqanngikkaluartoq.

2. Tusarniaassutaasumi takuneqarsinnaavoq peqqussummi anguniakkanut naapertuuttumik nunap nunaminertaasa atorneqarnissaat Naalakkersuisut kommunalbestyrelsillu pilersaarusiornikkut qulakkeerniassagaat. Tamanna eqqunngilaq. Pilersaarusiornermut qulliinerusutut akisussaaffik Naalakkersuisuniippoq kommuninullu tunniunneqarsinnaanani. Pilersaarusiornermut kommunit peqataanissaminnut pisussaaffeqartut peqqussummi kapitali 4-mi takuneqarsinnaavoq.

3. COWI tusarniaanermut akissutimini oqaatigaa oqaatsip "immikkut pingaartitsinissaq" ("serlige hensyn") [§10] atorneqarnerani sunarpiaq pineqarneris erserterluttoq. "Immikkut pingaartitsinissamik" oqarnermi assersuutigalugu illuliat piginnittuvinut soqutiginaatillit Namminersornerullutik Oqartussat/naalagaaffiup oqartussaasuinit isumagineqartut aamma pineqarpat?"

Naalackersuisoqarfiup tassunga tunngatillugu oqaatigissavaa oqariaaseq "immikkut pingaartitsinissaq" paasineqassasoq, oqartussaasut inatsisitigut aalajangikkamik suliaasaat imaluunniit suliaasaat allat pingaarutillit politikkikkut aalajangiunneqartut, nunamut namminermut soqutiginaateqartut naatsorsuutigineqarsinnaasut, ilanngullugit inatsisinik atuuttunik, suliaasaqarfinnut pilersaarusiormik, nunat tamalaat akornanni isumaqatigiissutinik il.il., isumaginninnissaq. Tamatumani assersuutigalugu Namminersornerullutik Oqartussat illumik aalajangersimasumik piginninnermikkut immikkut soqutigisaqartuusinnaanerit mattunneqanngilaq.

Taamaattumik "immikkut pingaartitsinissaq" tunngavigalugu akerliliissuteqarnerni inatsisit atuuttut malinneqarnissaannik innersuussuteqarnerit imaluunniit assersuutigalugu sanaartugassamik politikkikkut aalajangiunneqarsimasumik erseqqissaanerit pineqarajuttartussaassapput.

4. Peqqussutissanut siunnersuummi nutaami §§15 aamma 17-mut tunngatillugu Uummannap kommuniata oqaatigaa tamanut saqqummiussinerit nunatta aviisiitigut imaluunniit qarasaasiaq atorlugu pisariaqaraluartut. Tamanna kommunip nittartagaatigut imaluunniit pilersaarusiormut nittartakkakkut pisinnaavoq, taamaalilluni aamma kommunip nunallu avataanni innuttaasut paasisaqarnissaannik periarfissillugit.

Naalackersuisoqarfiup Uummannap kommunia tamatumani isumaqatigaa. Naalackersuisoqarfiup aalajangersagaq pilersaarutit tamanut saqqummiunneqartut qarasaasiakkut pilersaarutitut isaarissamut ilanngunneqartarnissaannut tunngasoq ilannguppaa.

5. Narsap aamma Uummannap kommuniisa pilersaarutitut siunnersuutit piginnittunut, pisinnaatitaaffeqartunut allanilluunniit pilersaarutinik saqqummiunneqartunik immikkut soqutigisaqartunut nassiunneqartarnissaat pillugu peqqussutissatut siunnersuummi aalajangersagaq oqaaseqarfigaat.

Kommunip pilersaarutissatut siunnersuummik qanoq saqqummiussisarnissaanut periaatsimik sukateriniarnermut tunngavigineqarpoq, pilersaarutip atuutlernissaanut innuttaasut peqataatinneqarnissaat qanoq apeqqutaatigissanersoq isummersuutigineqarmat. Tassunga atatillugu oqaatigineqarpoq pilersaarusiormi tamanut ammasumik peqataatitsinissamut aalajangersimasumik malittarisassaqqanngimmat, tamanna takussutissaasoq innuttaasut pilersaarusiormerup oqallisigineqarneranut peqataatinneqartariaqaratik, peqataatitsineq pingaarnertut ilisimatitsinermik siunertaqartoq.

Naalackersuisoqarfiup tamanna taamaassorinngilaa. Innuttaasut peqataatinneqassapput. Kommunilli akerliliissuteqarnerat tusaatissatut tiguneqarpoq. Taamaalilluni aalajangersagaq imatut allanngortinneqarpoq "*tamanut saqqummiussineri kommunimi saqqummiussisoqartillugu nalinginnaasumik periaasiusartut atorneqassapput. Pilersaarusiartut siunnersuut kommunip nittartagaani takuneqarsinnaassaaq*".

6. Peqqussutissatut siunnersuummi § 17, imm. 4-mut Uummannap kommunea oqaaseqarpoq, pilersaarut kommunalbestyrelsip inaarutaasumik akuersissuteqareernerata kingorna sapaatit akunneri 6-it qaangiutsinnagit avammut saqqummiunneqarsimanngippat pilersaarutissatut siunnersuut atorunnaassasoq pillugu aalajangersakkami piffissarititaasoq sivikippallaartoq.

Naalackersuisoqarfimmit isumaqatigineqarpoq aallaaviatigut kommunalbestyrelsip aatsaat tamanut saqqummiussereerneratigut pilersaarut atuutilersinneqassasoq. Assersuutissaqarporli kommunit pilersaarutiniq suli tamanut saqqummiunneqarsimanngitsunik aallaaveqarlutik iliuseqartarsimasut. Aammattaaq kommuni nunami sumiiffik ataaseq aallaavigalugu arlalinnik assigiinngitsunik pilersaarusiorsinnaavoq. Tamanut saqqummiussinissamut killiliussisoqanngippat tamatuma kingunerissavaa, innuttaasut inatsisitigut pisinnaatitaaffiugallartunik, pilersaarusiormi tunngaviusut suut atuunnersut naatsorsuutigineqassanersut kiisalu maleruagassat suut tassani aalajangersarneqarsimanersut pillugit ilisimasaqalernaviannimmata. Tamanna pinaveersimatinniarlugu pilersaarusiap nutaanngilisoorinissaanut taamaatinneqarnissaanullu piffissaliussisoqarpoq. Taamaattumik Naalackersuisoqarfiup piffissamut killissaliussinermut piumasaqaat aalajangiusimaannarpaa. Piffissalli killiliussap sivissusaa apequtaavallaanngilaq. Taamaattumik pilersaarutissatut siunnersuummut tamanut saqqummiussinissamut piffissaliussaq sapaatit akunnerini arfinilinnit aqqaneq-marlunnet sivitsorneqarput.

7. Cowip tusarniaanermi akissummini oqaatigaa inatsisip maannakkut atuuttup erseqqissumik nassuiaraa kommunimut pilersaarutip inatsisitigut sunniutai kommunalbestyrelsimut pisussaaffiliisut (tak. Nunaminertat atorineqartarnerat pilersaarusiormifigineqartarnerallu pillugit Namminersorerullutik Oqartussat nalunaarutaat nr. 23, 18. november 1992-imeersumi

§ 10), aammalu sumiiffimmut pilersaarut innuttaasunut pisussaaffiliisoq. Tamanna iluaqutaasumik erseqqissaavigineqarsinnaavoq; soorlu nassuiaatini.

Naalackersuisoqarfik kommunimut pilersaarutip inatsisitigut sunniutaasa erseqqissaavigineqarnissaat pillugu Cowip isummersuutaanut isumaqataavoq. Tassami pingaarnersutigut pilersaarutit marluk assigiinngitsunik inissimaffeqarlutik atuussimasut tamarmillu immikkut inatsisitigut atuuffeqartut pineqarmata, kommunalbestyrelsip kommunimut pilersaarutip pingaarnertut ilusiligaaneranik aalajangersagartaanillu piviusunngortitsiniarnissaa, naqissusissallugu pingaarteqarpoq. Aammattaaq kommunimut pilersaarutip aalajangersagartai innuttaasunut inatsisitigut pisussaaffiliippat.

8. Namminersorerullutik Oqartussat Illuliornermut oqartussaasuata tusarniaanermut akissuteqaatimini oqaatigaa, peqqussutissatut siunnersuummi illuliornermut oqartussaaneq pillugu aalajangersakkat peqqussummit peerneqassat siunnersuutigineqartoq, kisiannili tassani nunaminertanik atuneq aamma pilersaarusiormeq pillugit Inatsisartut peqqussutaat nr. 6, 19. december 1986-imeersumi §§ 21-23 aamma § 29 atorunnaarsitsinermut aalajangersakkani ilanngunneqannginnissaat siunnersuutigineqarluni, tak. siunnersuutaaqqaartumi atuutilersitsinissamut aalajangersakkat.

Namminersornerullutik Oqartussat illuliornermut oqartussaasuata maluginiaqquaa nunaminertanut peqqussummi maannakkut atuuttumi §§ 24-27-mi "Ataatsimut aalajangersakkat" illuliornermik oqartussaasunut tunngasoq ilaasoq. Taamaalilluni siunnersuummi atuutilersitsinissamut aalajangersakkani ilaatitsinnginneq illuliornermut oqartussaasut pillugit aalajangersakkat amigaateqalernerannik kinguneqartussaavoq.

Piffissaq sivisunerusoq eqqarsaatigalugu nunaminertanut peqqussummi maanna atuuttumi §§ 21-23-mut taarsiullugit illuliornermut inatsisiliortoqarnissaa eqqarsaatigineqarpoq. Tamatumali pinissaata tungaanut naleqqunnerpaassaaq illuliornermut oqartussanut inatsisitigut tunngavissat nunaminertanut inatsisimmi ilaatinneqarpata.

Illuliornermik oqartussaasut ilanngullugu oqaatigaat nunaminertanut peqqussummi atuuttumi § 29-p atorunnaarsitsinissamik aalajangersakkani ilaatinneqannginnissaa pisariaqaanngitsoq, § 29 naapertorlugu najoqqutassiat tamarmik atorunnaarsinneqareermata.

Illuliornermut oqartussap oqaaseqaatai Naalakkersuisoqarfimmit tusaatissatut tiguneqarput. Illuliornermut oqartussaaneq pillugu kapitali 7 nutaaq ilanngunneqarpoq. Oqaasertaasa aalajangersakkat atuuttut assigai. Aammattaaq atuutsitsilernissamut aalajangersakkat allannguuteqartinneqarput, illuliornermut oqartussaasunut inatsisitigut tunngavissat, immikkut illuliornermut inatsisip pilersinneqarnissaata tungaanut, suli nunaminertanut inatsimmi ilaaginnassallutik.

Aalajangersakkanut ataasiakkaanut nassuiaatit

§ 1-mut

Aalajangersagaq nunaminertanik atuineq aamma pilersaarusiorneq pillugit Inatsisartut peqqussutaat nr. 6, 19. december 1986-imeersumi § 1-imik annertunerusutigut ingerlatitseqqiineruvoq. Inatsisartut peqqussutaannut atuuttumut naleqqiullugu "najukkani oqartussanik" peqataatitsinissamik siunertaasoq normu 4-imi ilanngunneqanngilaq. Tamatumunnga pissutaavoq kommunalbestyrelsit Inatsisartut peqqussutaannut nutaamut atatillugu, sumiiffinni illoqarfiusuni aammalu nunaannarmi, pilersaarusiornissamut kommunimilu nunaminertanik ingerlatsinissamut aalajangiisinnaatitaaffik tigusussaammassuk. Taamaattumik kommunit peqataatinneqarnissaasa qularnaarnissaa pisariaqaanngilaq.

Aalajangersakkami Inatsisartut peqqussutaata nalinginnaasumik siunertaa, sumiiffinni sanaartorfigineqarsimasuni (illoqarfiit nunaqarfiillu) nunaannarmilu, pilersaarusiornikkut nunaminertanillu atuinermut maleruagassiinikkut qularnaarneqartussaq pineqarpoq. Taamaalilluni siunertaasup nunaminertanut atuinermut pilersaarusiornermullu inatsisartut peqqussutaata 1986-meersup maanna atuuttup siunertaata pingaarnerup assigaa, aalajangersarneqarlunilu nunaminertanut

atuinissamut aalajangersakkat inuiaqatigiit eqqarsaatigalugit ataatsimut tamakkiisumik naliliinikkut pisarnissaa piunasaqataasoq.

Inuiaqatigiit eqqarsaatigalugit tamakkiisumik naliliineq aallaavigalugu nunap nunaminertaasa atornerarnerat pisassasoq, aalajangersakkami pkt. 1-imiit 5-imut eqqarsaatigineqartussat taaneqartut isumagineqarnerisigut naammassineqartut isigineqarpoq.

1) Ukiuni makkunani kalaallit inuiaqatigiit suliffissuaqarnermut annertusiartortumut ineriartortitsivigineqarput, pisuussutinillu uummaatsunik piiaanissanut suliniutit amerliartuinnarput. Ineriartornerup tamatuma qanoq isikkoqarnissaanut qanorlu annertutiginissaanut aalajangiinissami pinngortitap illersorneqarnissaa, uummasut naasullu taamatullu nunap isikkua eqqarsaatigalugu piorsarsimassutsimullu tunngatillugu naleqartitat illersorneqarnissaannik qulakkeerisussaq pingaartinneqassaaq.

2) Tassunga atatillugu nunaminertat illoqarfittut imaluunniit nunaqarfittut isikkoqalersillugit illuliorfigineqartussatut immikkoortitanut, sanaartukkanut inunnit pilersinneqartunut immikkoortitanut, nunallu sinnerani nunap ilaani qangatuut inuussutissarsiornermut, mernguersarnernut, ilisimatusarnermut pinngortitallu allanngutsaaliornissaanut atorneqaannartussatut immikkoortitanut, naapertuuttumik agguataarneqarnissaat pingaaruteqarpoq.

3) Pilersaarusiornermut naapertuuttumik nunap nunaminertaasa atornerarneraat, pingaartinneqartussat taaneqartut isumagineqarnissaannut qularnaarinissamut sakkussaavoq pingaarutilik. Pilersaarusiorneq taanna suliarineqassaaq, inuussutissarsiornarup ineriartortinneqarnerata siuarsarneqarnissaanut pisariaqartitat atugarissaarluni inuuniarnermut tunngaviusut eqqarsaatigalugit. Peqatigisaanik inooqatigiinnermi avatangiisitigullu eqqarsaatigisassat isumagineqassapput taamaalillunilu inuiaqatigiinni tulluurtumik ineriartortitsinissamut periarfissaqalissaaq.

Tassunga tunngatillugu oqaaseqatigiit "inooqatigiinnermi avatangiisitigullu eqqarsaatigisassat" siamasissumik paasineqassapput, taamaalillunilu assersuutigalugu aamma pinngortitami immikkut soqutiginaatilinnik aammalu illunik piorsarsimassutsikkut naleqartitanik allanngutsaaliuinissaq tassani pineqarpoq.

4) Kalaallit Nunaanni pilersaarutit pillugit inatsisini maannamut atuuttuni innuttaasut nunaminertat qanoq pilersaarusiorfigineqarnissaannut sunniuteqaqataasinnaamissaat pingaartinneqarsimavoq. Tunngaviusup taassuma atuutiinnarnissaa kissaatigineqartoq, najukkani sunniuteqaqataasinnaanerup ataqqineqarnissaata pequssutissatut siunnersuutip siunertaani takuneqarsinnaaneratigut naqissuserneqarpoq. Pilersaarusiornarup ingerlanerani innuttaasut peqataatinneqarnissaat pingaaruteqarluinnartut isigineqartariaqarpoq. Pilersaarusiornarup ingerlanerani innuttaasut piviusumik peqataatinneqarnerat kikkut tamarmik oqartussaaqataasut sunniuteqaqataasinnaamik periarfissaannik nukittorsaaginnangilaq; innuttaasut najukkaminni sukumiisumik ilisimasaqarnerat

pissutigalugu, peqataatitsineq taamatuttaaq pitsaassutsikkut pitsaanerusumik pilersaarusiornissamut aqqutissatut isigineqartariaqarpoq.

5) Sanaartorfissanik pilersaarusiornierup inernerisa ilaannik annertuunik piviusunngortitsinissamut, pisariaqartunik aningaasassaqaarneq imaluunniit aningaasassaqalersinnaaneq pisariaqarpoq. Taamaattumik sanaartorfissanik aningaasatigullu pilersaarusiorniermut ataqatigiissaakkamut killiliussat iluanni nunaminertanik atugassiinissanik aalajangiisarnissaq pisariaqartumik ataqqineqartussaavoq.

§ 2-mut

Aalajangersagaq nunaminertanik atuineq aamma pilersaarusiorneq pillugit Inatsisartut peqqussutaat nr. 6, 19. december 1986-imeersumi § 2-imut oqaatsitigut allannguuteqarluni assinguvoq.

Aalajangersakkami Naalackersuisut nunami pilersaarusiorniermut soqutiginaatilinnik isumaginnittumik pilersaarusiortoqarnissaanik ataatsimut isigalugu akisussaasuusut aalajangersarneqarpoq. Peqqussutissatut siunnersuut sanaartorfissanik pilersaarusiorniermut Inatsisartut peqqussutaattut eqikkakkatut iluseqarmat, tamatuma kingunerisaanik Namminersornerullutik Oqartussani suliassaqaarfinnut oqartussaasut assigiinngitsut pilersaarusiornissamik pisussaaffeqarput. Pilersaarusiornissamut pisussaaffeqarnerup taassuma nassatarisaanik pissutsit nunamut namminermut soqutiginaatillit, nunaminertat atorneqarnissaanik aalajangiiffigineqartariaqartut imaluunniit killilersuiiffigineqartariaqartut isumaginiarlugit, suliassaqaarfimmuut oqartussaasut ataasiakkaat nunaminertat pineqartut killilerneqarnerinut kiisalu nunaminertamut pineqartumut aalajangiussineq qanoq malitseqassanersoq pillugu nassuiaanissamut pisussaaffeqarput. Assersuutigalugu tassani pineqarsimasinnaapput siunissami illuliornermik imaluunniit sanaartornermik suliassanut, qaartartuusivinnut, timmisartunut suluusalinnut mittarfinnut, imermik pissamaateqarfittut immikkoortitani imaluunniit nalunaarasuartaateqarnermut atortunut sumiiffinni immikkut ittumik killeqarfeqartinneqartussanut atatillugu nunaminertanik inniminniinerit.

Tamatumunnga pissutaavoq Namminersornerullutik Oqartussani oqartussat assigiinngitsut suliassaqaarfinnut pilersaarusiornierat ataatsimut katillugu sanaartorfissanik pilersaarusiorniermi nuna tamakkerlugu pilersaarusiorniermut tunngatillugu soqutiginaateqarmat. Taakkua kommunimi pilersaarusiorniermut sinaakkutissaapput. Namminersornerullutik Oqartussani oqartussaasoq nunaminertanut atugassiissutaasunut pilersaarusiunngippat, tassani taamaalilluni kommunit siunissamut sanaartorfissanik pilersaarusiornissamut periarfissaarutsinneqassaaq, tak. § 1.

Taamaattumik Naalackersuisuni sanaartorfissanik pilersaarusiorniermut suliassaqaarfimmi oqartussaasoq maannakkutut Naalagaaffiup aamma

Naalackersuisut suliassa qarfiit sinnerinut oqartussaasui suleqatigalugit, peqqussummi aalajangersakkanik aqutsisuusaaq.

§ 3-imut

Aalajangersagaq piginnaatitsisumik aalajangersagaavoq aammalu nunaminertanik atuineq aamma pilersaarusiorneq pillugit Inatsisartut peqqussutaat nr. 6, 19. december 1986-imeersumi § 3-imik ingerlatitseqqinnerulluni.

Aalajangersagaq ator neqarpoq, nunaminertat ator neqartarnerat pilersaarusi orfigineqartarnerallu pillugit Namminersornerullutik Oqartussat nalunaarutaata nr. 23-ip 18. november 1992-imeersup, nunaminertat ator neqartarnerat pilersaarusi orfigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersup allanngortinneqarneranik Namminersornerullutik Oqartussat nalunaarutaat nr. 39, 20. september 1994-imeersup, nunaminertat ator neqartarnerat pilersaarusi orfigineqartarnerallu pillugit Namminersornerullutik Oqartussat nalunaarutaata allanngortinneqarneranik Namminersornerullutik Oqartussat nalunaarutaat nr. 43, 15. november 1994-imeersup, kommune kkaartumik pilersaarusi ornermi allanngutsaaliuisussa anermik nakkutiginnittussaaneq pillugu Namminersornerullutik Oqartussat nalunaarutaat nr. 28, 6. august 1991-imeersup, kommune kkaartumik pilersaarusi ornermi allanngutsaaliuisussa anermik nakkutiginnittussaaneq pillugu Namminersornerullutik Oqartussat nalunaarutaat nr. 31, 30. oktober 1991-imeersup, Kalaallit Nunaanni illuliortiternermi oqartussaasuseq pillugu Namminersornerullutik Oqartussat nalunaarutaat nr. 24, 9. november 1987-imeersumi, illuliortiternermi oqartussaasuseq pillugu Namminersornerullutik Oqartussat nalunaarutaat nr. 13, 18. august 2006-imeersumi, nuna qarfinnut pilersaarutit allannguuteqartinneqarneri pillugit kommunimut pilersaarutininut tapiliussat tamanut tusarniaassutigineqartarneri pillugu Aningaasaqarnermut pisortaqarfiup kaajallaasitaa nr. 1, 22. april 1996-imeersup, suliarineqarnerisigut.

Aalajangersakkami Naalackersuisut sanaartorfissanik pilersaarusi ornerup suliarineqarnissaanut, imarisassaanut piviusunngortinneqarnissaanullu erseqqinnerusunik maleruagassiorsinnaasut inatsisitigut tunngavissinneqarpoq. Oqaaseq "sanaartorfissanik pilersaarusi orneq" uani paasineqassaaq missingersuutitigut maleruagassinneqartartumut imaluunniit aningaasanut inatsimmi maleruagassinneqartartumut "aningaasaqarnermik pilersaarusi ornermut" illuatungiusutut. Oqaaseq avatangiisini sanaartorfissanik pilersaarusi ornertut nassuiarneqassaaq, ilanngullugit nunaminertat, illuutit aamma sanaartukkat ator neqartarnissaat, inissisimaffissaat aammalu ilusilersorneqarnissaat il.il. Tamatuma saniatigut oqariaatsimi pineqarput avatangiisini sanaartorfissat eqqaaniittuni killilersuutit nunaminertanut atugassiissutaasunut, illulianut imaluunniit sanaartukkanut atatinneqartut. Aalajangersakkami nuna tamakkerlugu pilersaarusi ornissamut, kommunimut pilersaarusi ornissamut kiisalu peqqusut manna naapertorlugu allatigut oqartussaasutut suliaqarnissamut maleruagassanik erseqqinnerusunik aalajangersaanissaq tunngavissinneqarpoq.

Nunaminertanik atuinnermut erseqqinnerusumik maleruagassiinissaq kiisalu sanaartorfissanik pilersaarusiorderup imarisassaannut ilusissaannullu maleruagassanik peqqussutissatut siunnersuummi aalajangersaanissaq naleqqutsinneqanngilaq. Tamanna pissaaq Inatsisartut peqqussutaata malitsigisaanik maleruagassanik aalajangersaanikkut. Maleruagassat kommunimut pilersaarusiordermi, tak. § 13, sunik maleruagassiisoqarsinnaanersoq maleruagassiisoqassanersorlu pillugit katalogitut ilusilerneqarsinnaasut ilaatigut eqqarsaatigineqarsinnaavoq.

Assersuutigalugu tassani pineqartut tassaasinnaapput nunaminertat atorpeqartarnerannut, illut imminnut ungasissusissaannut, illut sanaartukkallu inissisimaffissaannut silataasalu isikkussaannut tunngatillugu kommunimut pilersaarummi aalajangersakkanut immikkoortortaq pillugu kiisalu kommunimi nunaminertanik aqutsinerup ingerlanneqarnissaa pillugu maleruagassat erseqqinnerusut, nunaannarmi piffissat ilaanni nakkutilliisarnissaq pillugu maleruagassat il.il. Tamatuma saniatigut aamma eqqarsaatigineqarsinnaavoq Inatsisartut peqqussutaannik aqutsinnermut atatillugu sulinnermi ajornartorsiutit paasinarsisimasinnaasut eqqarsaatigalugit aalajangersakkanik aalajangersaasoqarsinnaasoq, ilanngullugu pingaartumik § 27 naapertorlugu nunaannarmi kommunip aqutsineranut tunngatillugu.

Aalajangersakkami oqaaseqatigiinni kingullerni Naalakkersuisut kommuninut ilitsersuisussaataasut aalajangersarneqarpoq. Tassunga atatillugu oqaatigineqassaaq Naalakkersuisut kommuninut suliani ataasiakkaani ingerlasuni aalajangersimasuni siunnersuisinnaassanngimmata. Ilitsersuineq taamaalilluni nalinginnaasumik ilitsersuinertut iluseqartinneqassaaq.

§ 4-imut

Aalajangersagaq imm. 1-imi oqaatsitigut allannguuteqartinneqarluni nunaminertanik atuneq aamma pilersaarusiorderneq pillugit Inatsisartut peqqussutaat nr. 6, 19. december 1986-imeersumi § 7-imi ingerlatitseqqiineruvoq.

Imm. 1-imut

Aalajangersakkami nunamut tamarmut pilersaarusiordermi piareersaanermut suliaqartarnermullu akisussaaffik Naalakkersuisuniissasoq oqaatigineqarpoq. Naalakkersuisut nuna tamakkerlugu pilersaarusiorderup naammassineqarnissaanut pisariaqartunik misissuisarnissaannik piumasaqaat, pissutsit arlaqartut pilersaarusiordermut pingaaruteqartut suliaasaqarfinnut oqartussat ataasiakkaat pilersaarusiorderanni takuneqarsinnaasannginnerat aallaavigalugu aalajangersarneqarpoq. Tamatumunnga assersuutaasinnaapput inuiaqatigiinni innuttaasut amerlassusaasa allanngoriartornerat, inuiaqatigiit nuttariaasii, suaassutsikkut assigiinngissutsit kiisalu paasissutissat pioreersut assigiissaartarneri il.il.

Imm. 2-imut

Naalackersuisut nuna tamakkerlugu nunami sumiiffinnut tamanut paasissutissanik katersuiffimmik, qarasaasiaq atorlugu pilersaarusiornermut isaaffimmik suliaqartitsissapput. Avatangiisinut Aqutsisoqarfiup web-GIS taamaattoq, NunaGIS-imik taagorneqartoq, Namminersornerullutik Oqartussat aamma kommunit pilersaarusiornerat pillugu paasissutissanik imaqartussaq, nittartagaq www.nunagis.gl isaariarlugu 2008-imi aprilimi tamanut saqqummiuppaa. Naatsorsuutigineqarpoq kommunit tamarmik 2008-ip ingerlanerani nammineq isertaatiminnik atuillutik NunaGIS-imut toqqaannartumik paasissutissanik nalunaarsuisinnaalissasut.

1. Aalajangersakkami pineqarput nunaminertat atornerqarfissaannik aalajangersaanerit, ilanngullugit sumiiffiit killeqarfiillu immikkut killeqarfeqartitassat, eqqissimatitassanngortitsinerit aamma nunaminertanik inniminniinerit inatsisit allat, nunat tamalaat akornanni isumaqatigiissutit naapertorlugit aalajangersagaasut imaluunniit Namminersornerullutik Oqartussat suliaqarfinnut pilersaarutaat naapertorlugit kiisalu kommunimi pilersaasiordermi aalajangaasut. Paasissutissat taakku qarasaasiaq atorlugu nunami sumiiffinnut tamanut paasissutissanik katersuiffimmik NunaGIS-imut nalunaarutigineqassapput. Taakku assersuutigalugu tassaasinnaapput pinngortitamik eqqissimatitassanngortitsinerit, qaqqat timmissat inaasa, imermik pissamaateqarfittut immikkoortitat aamma qaartartuusiviit eqqaanni killeqarfiit immikkut killeqarfeqartit kiisalu sumiiffiup ilaani aalajangersimasumi immikkut mingutsitsisumik suliaqarnissamik atugassiinerit pillugit paasissutissat il.il.

Paasissutissanik Naalackersuisunut nalunaarutiginnittarnermut aamma nutarterisarnermut suliaqarfinnut oqartussaasut/kommunalbestyrelsit ataasiakkaat akisussaaffeqarput.

Imm. 3-imut

Pisariaqaraangat, kisiannili minnerpaamik ukiut sisamakkaarlugit Naalackersuisut Namminersornerullutik Oqartussat kommunimut pilersaarusiornermi soqutiginaateqartitaasa ataatsimoortumik takussutissiornissaat isumagissavaat. Pilersaarusiornermi Namminersornerullutik Oqartussanut soqutiginaatilinnik takussutissiamik iluarsaassinissamik qaqugukku pisariaqartitsisoqartassanersoq pillugu apeqqummut ataasiakkaatigut naliliineq apeqqutaassaaq.

§ 5-mut

Aalajangersagaq nunaminertanik atuineq aamma pilersaarusiorneq pillugit Inatsisartut peqqussutaat nr. 6, 19. december 1986-imeersumi § 8-imik ingerlatitseqqiineruvoq. Aalajangersagaq erseqqissarneqarpoq taamaalilluni maannakku takuneqarsinnaalerluni paasissutissat Naalackersuisunut nalunaarutigineqartassasut.

Aalajangersakkami aalajangersarneqarpoq pisortat oqartussat, ilanngullugit Naalagaaffiup, Namminersornerullutik Oqartussat kommunillu ataanni suliffeqarfiit

suliassaqarfinnut pilersaarusiortartut kiisalu suliffeqarfiit ataasiakkaat, nuna tamakkerlugu pilersaarusiormik suliaqarnermut pingaaruteqartunik suliniuteqarnerit pillugit Naalakkersuisut paasissutissittassagaat.

Suliffeqarfinni eqqarsaatigineqarput pisortanit pigineqartut pilersuiffeqatigiiffiit soorlu Nukissiorfiit, TELE Greenland A/S aamma Royal Arctic Line A/S, taamatuttaarlu suliffeqarfiit namminersortunit pigineqartut angisuut, angissusiat eqqarsaatigalugu ilaatigut tamanut sullissinissamut pisariaqartinneqalersinnaasut.

Paasissutissat taakkua nuna tamakkerlugu pilersaarusiormi, Naalagaaffimmi, Namminersornerullutik Oqartussani kommuninilu siunissami suliassaqarfinni piorsaanissamut anguniagassanik kingusinnerusukkut suliaqarnissami tunngavissanut najoqqutassatut atorneqassapput.

§ 6-mut

Aalajangersagaq oqaatsitigut allannguuteqartinneqarluni nunaminertanik atuineq aamma pilersaarusiorneq pillugit Inatsisartut peqqussutaat nr. 6, 19. december 1986-imeersumi § 9-imik ingerlatitseqqiineruvoq.

Imm. 1-imut

Aalajangersakkami nalunaarneqarpoq, Naalakkersuisut nuna tamakkerlugu pilersaarusiormik suliaqarnerminni naalagaaffiup oqartussaasuisa aamma Namminersornerullutik Oqartussat oqartussaasuisa assigiinngitsut suliassaqarfinnut pilersaarutaat ataatsimoortittassagaat aammalu nuna tamakkerlugu pilersaarusiormerup pilersaarusiormut kommunini suliarineqartumut atatillugu aaqqissuunneqartarnissaa isumagissallugu. Nuna tamakkerlugu pilersaarusiormik suliaqarneq taamaalilluni kommunit peqataatillugit ingerlanneqartassaaq.

Imm. 2-imut

Namminersornerullutik Oqartussat suliassaqarfinnut pilersaarusiaannik akuersissuteqartarnermi innuttaasunik peqataatitsinissaq piumasaqaataanngilaq. Taamaattorli Naalakkersuisut paasititsiniaanermik ingerlatsissapput, innuttaasut isummaminnik saqqummiussinissaannik aalajangiinernilu innuttaasut inuuniarnerminni atugaannik sunniisussani peqataanissaannik periarfissiisumik.

§ 7-mut

Aalajangersagaq nunaminertanik atuineq aamma pilersaarusiorneq pillugit Inatsisartut peqqussutaat nr. 6, 19. december 1986-imeersumi § 10-imik ingerlatitseqqiineruvoq.

Aalajangersakkami Naalackersuisut nuna tamakkerlugu pilersarusiornermik ingerlaavartumik suliaqarnerat ukiut tamaasa Inatsisartunut nassuiaatitut ilusilerlugu saqqummiunneqartassasoq aalajangersarneqarpoq.

Nuna tamakkerlugu pilersarusiornermut nassuiaat nuna tamakkerlugu nunaminertat atorineqarnissaannut malittarisassanik ataqatigiissaakkanik imaqaarsinnaavoq aammalu ataatsimut isigalugu ineriartortitsinissamut anguniakkanik arlaqartunik nassuiaatinik imaqaarsinnaalluni, assersuutigalugu tunisassiorfiit aammalu inuussutissarsiornermi suliffeqarfiit allat inissinneqarnissaannut, angallannikkut teknikkikkullu pilersuinermit, innuttaasunut pissutsinut, sanaartornermut, isumaginninnermi peqqinnissaqarfimmilu sullissinermit kiisalu avatangiisinik illersuinermit eqqissisimatitsinissamullu tunngatillugu.

Malittarisassat taakkua tunngaviusut allannguuteqarneranni siunertanullu nutaanut tulluussartuarnissaat pingaaruteqarpoq. Nuna tamakkerlugu pilersarusiorneq ingerlaavartuarmik suliaassatut isigineqassaaq, suliaasaq pingaarneq tassaassalluni kommunini sanaartorfissanik pilersarusiornermut tunngaviusussanik, naalackersuinnikkut aalajangiinissanut pisariaqartunik tunngavissiisarnissaq.

§ 8-mut

Aalajangersagaq imm. 1-imi aamma 3-imi imarisamigut allannguuteqartinneqarluni nunaminertanik atuineq aamma pilersarusiorneq pillugit Inatsisartut peqqussutaat nr. 6, 19. december 1986-imeersumi § 11-imik ingerlatitseqqiineruvoq. Aalajangersakkami tassani pineqaraluarpoq Naalackersuisut "nuna tamakkerlugu pilersarusiornermut tunngatillugu malittarisassanik pingaarnernik" Inatsisartuni akuerisassanngorlugit saqqummiussisussaataitaanerit kiisalu tamatumunnga pisariaqartillugu taakkuninnga iluarsaassisussaataitaanerit. Aalajangersakkap imarisaatigut allannguinermit pissutaavoq qitiusumik suliaasaqarfinnut arlalinnut aalajangiisinnatitaaneq ullumikkut Naalackersuisunut suliaassanngortitaareemat. Taamaattumik Inatsisartut "sanaartorfissanik pilersarusiornermut eqikkaasumut malittarisassanik pingaarnernik" akuersisussaaneq pillugu ataatsimut isigalugu piumasaaqatip atorunnaarsinneqarnissaa naleqquttuusorineqarpoq. Taamaattumik suliaasaqarfinnut assigiinngitsunut nuna tamakkerlugu pilersaarutini soqutiginaatilinnik akuersisarneq suliaasaqarfinnut inatsisit malillugit aalajangiisinnatitaanerit naapertorlugit suliaasaqarfinnut ataasiakkaanut pisariaqassapput.

Kiisalu oqaatigineqassaaq nuna tamakkerlugu pilersarusiornermut soqutiginaatilinni sanaartorfissanik pilersarusiorneq tassunga atatillugu aningaasanut pilersarusiornermut ataqatigiisillugu paasineqartariaqartoq: Illuliortiterneq imaluunniit sanaartorneq aningaasanut inatsimmi aningaasalersorneqartussaasimappat, sanaartorfissanik pilersarusiornerup piviusunngortinneqarnissaanut taamaalilluni pingaarnerusutigut Inatsisartut akuersinissaat suli apequtaassussaavoq.

Aalajangersakkami imm. 2 nutaajuvoq, tassani tunngavissinneqarluni Naalakkersuisut nuna tamakkerlugu pilersarusiornermut soqutiginaatilinnik isumaginninnissaminut atatillugu sumiiffiup ilaani aalajangersimasumi atuinissamut aalajangersakkanik sukumiisumik maleruagassiisunik aalajangersaasassasut.

Aalajangersakkami imm. 3 allannguuteqartinneqarpoq, nuna tamakkerlugu pilersarusiornermut malitassiat, taamaalillunilu nuna tamakkerlugu pilersarusiornerup pissusiviusumik piviusunngortinneqarnissaa, akuttoqatigiissaakkamik iluarsanneqartarnissaasa qulakkeerneqarnissaa siunertarlugu.

Imm. 1-imut

Naalakkersuisut sumiiffimmut aalajangersimasumut ataatsimut isigalugu politikiminnik erseqqissaasinnaapput, kommunimut pilersarusiat imarisassaannut pissusaaffiliisumik aalajangersaasinnaallutik. Nuna tamakkerlugu pilersarusiornermut malitassiaq ilaatigut nunami sumiiffimmi inissiinissamik, killiliinermik kiisalu atuinissamut maleruagassiisunik aalajangersakkanik, ungasissusissanut piunasaqaatinik kiisalu pisariaqarpat nunaminertani pineqartuni nunaminertanik inniminniinissamik il.il. imaqarsinnaavoq.

Imm. 2-imut

Naalakkersuisut nuna tamakkerlugu pilersarusiornermut malitassiani maleruagassanik aalajangersimasunik aamma sukumiisumik maleruagassiisunik aalajangersaasinnaapput, assersuutigalugu nunaminertat erseqqinnerusumik taaneqartut siunertanut erseqqinnerusumik taaneqartunut atugassanngortillugit.

Aalajangersagaq naapertorlugu Naalakkersuisut aalajangiisinnaapput, nuna tamakkerlugu pilersarusiornermut malitassiaq sukumiisunik aalajangersagartaqartoq, kommunimut pilersaarutituulli inatsisitigut sunniuteqartinneqassasoq. Tamanna isumaqarpoq Naalakkersuisut assersuutigalugu illuliortiterneq sanaartornerlu, nuna tamakkerlugu pilersarusiornermut malitassiami sukumiisunik aalajangersakkanik aalajangersaavigineqarsimasoq, kommunimut pilersaarummik peqanngikkaluartoq aallartinneqarsinnaasoq aalajangiisinnaasut. Tassani pineqarpoq, pisuni nuna tamakkerlugu pilersarusiornermut malitassiami aalajangersakkat imatut erseqqitsigisut, taassuma saniatigut pilersarusiornissamik isumaliuteqarnissaq pisariaqarani. Taamaattoqartillugu nuna tamakkerlugu pilersarusiornermut malitassiaq pilersarusiornermut tunngavissatut allaffissornermi aqutsinermi atorneqarsinnaavoq.

Tassani assersuutigineqarsinnaavoq Inatsisartut sanaartugassamut aalajangersimasumut sanaartornermut inatsimmik atuuttussanngortitsisimasut, assersuutigalugu erngup nukinganik innaallagissiorfiliornissamut, sanaartugassap sumiiffissaanik aamma/imaluunniit ilusissaanik erseqqissaasumik imaqartoq. Taamaattoqartillugu kommunimi pilersarusiornermut oqartussat kommunimut

pilersaarummut tapiliussamik suliaqarnissaannik suliakkersorneqarnissaat pisariaqassanngilaq.

Imm. 3-imut

Naalackersuisut pisussaapput nuna tamakkerlugu pilersaarusiornermut malitassiat akuerisat, iluarsineqarnissaat imaluunniit allannguuteqartinneqarnissaat pisariaqalertillugu aaqqissuuteqittassallugit. Taamaattorli nuna tamakkerlugu pilersaarusiornermut malitassiat akuerisat, minnerpaamik ukiut sisamakkaarlugit aaqqissuuteqqinneqartassapput.

Nuna tamakkerlugu pilersaarusiornermut malitassiat imaluunniit suliassaqarfinnut pilersaarusiortit, § 8 naapertorlugu inatsisitigut sunniuteqalersinneqassagunik Naalackersuisunit akuerineqassapput.

§ 9-mut

Aalajangersagaq imm. 1-imi nunaminertanik atuineq aamma pilersaarusiorneq pillugit Inatsisartut peqqussutaat nr. 6, 19. december 1986-imeersumi § 12-imik ingerlatitseqqiineruvoq kiisalu aalajangersakkami imm. 2 imarisamigut nunaminertat atorineqartarnerat pilersaarusiortifigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 26-imut uiggiussaalluni.

Imm. 1-imut

Pisortat pilersaarusiortit paasineqassaaq tassaasoq pilersaarusiornermut oqartussat pilersaarusiortitinerat, atuutilersitinerat aammalu pilersaarutit akuersissutillu malinneqarnissaannik isumaginninnerat.

Aalajangersakkami nuna tamakkerlugu pilersaarusiortit inatsisitigut sunniutissai aalajangersarneqarput, taamaalilluni pisortat oqartussaasut suliassaqarfinnut soqutiginaatillinnik aallussigaluarunik imaluunniit nunaminertanik atugassiinissamut aalajangiisinnaatitaagaluarunik, nuna tamakkerlugu pilersaarusiortit innersuussutai naapertorlugit iliuuseqartarnissaminnut pisussaaffilerneqarlutik.

Tamatuma malitsigisaanik kommunimut pilersaarusiorneq, nuna tamakkerlugu pilersaarusiornermut malitassianik atuuttunik, inatsisinik allanik il.il. saneqqutsisoq Naalackersuisunit akuerineqartartussaavoq.

Suliassaqarfinnut soqutiginaatillit, ingerlatseqatigiiffinit namminersortunit imaluunniit pisortanit aquneqartunit inuiaqatigiinnut sullissinissamik suliakkerneqarsimasunit isumagineqarsinnaasut aamma eqqarsaatigineqarsinnaavoq.

Imm. 2-imut

Nuna tamakkerlugu pilersaarusiornermut soqutiginaatillit aalajangersimasut sumiiffimmut erseqqinnerusumik killilikkamut inissinniarlugit, Naalakkersuisut kommunalbestyrelsi sumiiffiup ilaani aalajangersimasumi ataatsimi arlalinniluunniit kommunimut pilersaarusiamut tapiliussamik, imarisassai erseqqinnerusumik taallugit, tak. § 19, suliaqarnissaanik peqqusinnaavaat. Imaluunniit Naalakkersuisut kommunip pilersaarusiornissamik oqartussaaffia tigusinnaavaat tamatumunnga maleruagassat malillugit kommunimut pilersaarummut tapiliussamik suliaqartitsisinnaallutik.

Naalakkersuisut nammineerlutik kommunimut pilersaarummut tapiliussamik suliaqartitsissanersut pisuni ataasiakkaani naliliineq apeqqutaassaaq aammalu Naalakkersuisunit sukumiisumik maleruagassiinissaq kissaatigineqarnerseq annertuumik apeqqutaavoq. Naalakkersuisut aalajangiinerat annertuumik sukumiisumik maleruagassiinissamik kinguneqarsimappat, kommunimi pilersaarusiornermut oqartussat namminneerlutik pilersaarusiap imarisassaannik aalajangersaasinnaanissaat annikillisinneqassaaq imaluunniit periarfissaajunnaassalluni. Taamaattoqarsimassappat pilersaarummik tunngaviusussamik suliaqarnissamut kommunimi pilersaarusiornermut oqartussaasut suliakkersorneqartariaqassanngillat.

Assersuutigalugu Naalakkersuisunit aalajangerneqarsinnaavoq napparsimmavik nutaaq sumiiffimmi erseqqinnerusumik taaneqartumi inissinneqassasoq, illutaa quleriussasoq, sungaartuussasoq aammalu qaliata uinganera 30 gradiussasoq, il.il. Taamatut pisoqartillugu Naalakkersuisut sukumiisumik maleruagassiisunik aalajangersagaanni kommunalbestyrelsimiit sukumiisumik maleruagassiisunik aalajangersaaqqinnissamik ammaassisoqarsimanersaq pisuni ataasiakkaani naliliineq apeqqutaassaaq.

§ 9, imm. 2 malillugu aalajangiisinnaatitaanermik tigusinerup kingunerisaanik, Naalakkersuisut peqqussummi maleruagassanik allanik saneqqutsinissamut ammaanngillat, ilanngullugit suleriaatsinut maleruagassat il.il. Tassani taamaallaat kommunalbestyrelsit aalajangiisinnaatitaaffiannik tigusineq pineqarpoq.

Taamaattorli sumiiffiup ilaanut aalajangersimasumut pineqartumut sukumiisumik maleruagassiineq Inatsisartut inatsisaanni, Inatsisartut peqqussutaanni imaluunniit Namminersornerullutik Oqartussat nalunaarutaanni, nunat tamat akornanni isumaqatigiissutini aalajangersarneqarsimappat, § 15 malillugu tamanut saqqummiussisarnissamik piumasaaqat atorunnaarsinnaavoq. Tamatumunnga pissutaavoq taamaattoqarsimappat maleruagassat tamatumunnga atuuttut malillugit maleruagassiisoqartussaassammat.

§ 10-mut

Aalajangersagaq oqaatsitigut allannguuteqartinneqarluni nunaminertat atorneqartarnerat pilersaarusiornifigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 24-imik ingerlatitseqqiineruvoq.

Akerliliissuteqarnissamik pisussaaffeqarnerup sanaartorfissanik pilersaarusionermut ataatsimoortumut pingaaruteqarnera, taassuma inatsimmi maannamut atuuttumi kommunimut pilersaarutinik kommunimullu pilersaarutinut tapiliussanik akuersissuteqartarnermut aaqqissuussineq taarsermagu, nukittorsarneqartoq naatsorsuutigineqarpoq. Nunaminertat atorneqartarnerat pilersaarusionerfigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 8 naapertorlugu Naalackersuisut kommunimut pilersaarutinik aamma kommunimut pilersaarutinut tapiliussanik akuersisartuusimapput kiisalu tamatumunnga atatillugu atugassarititaasussanik piunarsaqarnissamik periarfissaqarsimallutik. Siunissami tamatuma akerlianik kommunalbestyrelsit nammineerlutik kommunimut pilersaarutinik aamma kommunimut pilersaarutinut tapiliussanik akuersissuteqarsinnaalissapput, taamaattumillu akerliliissutinik saqqummiussinissamik periarfissaq nuna tamakkerlugu pilersaarusionermut tunngatillugu soqutiginaatillit qularnaariffigineqarnissaannut qitiulluinnarpoq.

Imm. 1-imut

Kommunimi pilersaarutissatut siunnersuut ilaaluunniit immikkut pingaartitassanut naalagaaffiup oqartussaasuinit imaluunniit Namminersornerullutik Oqartussat oqartussaasuinit isumagineqartunut akerliusimappat, suliassaqarfimmut oqartussatut akisussaasoq pilersaarutissatut siunnersuummut akerliliissuteqarnissamik pisussaavoq.

Oqariaaseq "immikkut pingaartitsinissaq" paasineqassaaq, inatsisitigut aalajangiikkamik suliassat imaluunniit suliassat allat pingaarutillit politikkikkut aalajangiunneqartut, nunamut namminermut soqutiginaateqartut naatsorsuutigineqarsinnaasut, ilanngullugit inatsisinik atuuttunik, suliassaqarfimmut pilersaarusionermik, nunat tamalaat akornanni isumaqatigiissutinik il.il., isumaginninnissaq.

Akerliliissuteqarneq tamatigut tunngavilersorneqartussaq kommunimut pilersaarutissatut siunnersuusiorsimasumut, akerliliissuteqarnissamut piffissarititaasoq, tak. § 15, imm. 3, naatinnagu saqqummiunneqartassaaq. Akerliliissuteqarnissamulli pisussaataaffik atuutissanngilaq, pissutsit nuna tamakkerlugu pilersaarusionerup siunertaanut pingaaruteqanngippata.

Akerliliissummik kinguatitsinermik kinguneqartussamik saqqummiussinissamik pisinnaatitaaneq, naalagaaffiup aamma Namminersornerullutik Oqartussat oqartussaasuinit taamaallaat atuuppoq. Taamaalilluni ingerlatseqatigiiffimmut Namminersornerullutik Oqartussanit pigineqartunut atuutinngilaq. Ingerlatseqatigiiffiillu taakku taamaaliorusussagunik akerliliissuteqarnissaq piunarsaq Naalackersuisunut saaffiginnissuteqarsinnaapput.

Imm. 2-imut

Akerliliissuteqarneq saqqummiunneqareerpat, allannguutissat pisariaqartut pillugit attuumassuteqartut akornanni isumaqatigiittoqareerpat, pilersaarutissatut siunnersuut inaarutaasumik aatsaat akuerineqarsinnaavoq.

Imm. 3-imut

Isumaqatigiittoqarsinnaanngippat, attuumassuteqartut apeqqutit isumaqatigiinngissutaasut pillugit Naalakkersuisunut aalajangiiffigisassanngorlugit saqqummiussissapput.

Akerliliissuteqarneq pillugu suliamut kommunalbestyrelsi pineqartoq imaluunniit oqartussaasut akerliliissuteqartut tamatuminnnga piumasaqarneratigut Naalakkersuisut aalajangiissapput. Piumasaqaataavoq illuatungeriit tamatuma siorna isumaqatigiinniaqqaarsimassasut.

Akerliliissuteqarnermut suliamut Naalakkersuisut aalajangiinerat pisut apeqqutaallutik tassaasinnaavoq pilersaarusiassatut siunnersuut atuutilertussat akuersarneqarsinnaanngitsoq taamaattumillu atorunnaartoq, atuutilertussat akuerineqarnissaanut piumasaqaatit erseqqinnerusumik taaneqartunik allannguuteqartitsisoqassasoq, Naalakkersuisut tamatumunnga taarsiullugu pilersaarutissatut siunnersuutip ataatsimullu isigalugu pilersaarusiernerup akornanni naapertuuttunngortitsiniarlutik, nuna tamakkerlugu pilersaarusiernermut malitassiami imaluunniit inatsimmi allami pisariaqartunik allannguuteqartitsissasut, imaluunniit pilersaarutissatut siunnersuut allannguuteqartinnagu aammalu akerliliissutit saqqummiunneqarsimasut apeqqutaatinnagit atuutilertussat akuersissutigineqarsinnaasoq.

§ 11-mut

Aalajangersagaq iluarsanneqarluni nunaminertat atorneqartarnerat pilersaarusiortifigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 25, imm. 2-imik ingerlatitseqqiineruvoq

Imm. 1-imut

Naalakkersuisut kommunimut pilersaarutissatut siunnersuummut tamanut saqqummiunneqarsimasumut akerliliillutik saqqummiussisimappata, pilersaarutissatut siunnersuutip tamanut saqqummiunneqarneranit ukiut marluk tikillugit pilersaarutissatut siunnersuut inatsisitigut sunnuteqartinneqarallassoq Naalakkersuisut aalajangiisinnaapput. Piffissaliussamik sivitsuineri, tak. § 23, imm. 3, siunertaavoq pilersaarutissatut siunnersuutip inatsisitigut sunnuteqartinneqarallarnissaa atorunnaarsinneqanngikkaluartoq, Naalakkersuisut aamma kommunalbestyrelsip isumaqatigiilernissaanut piffissaqarnerulersitsinissaq.

Imm. 2-imut

§ 10 imm. 3 naapertorlugu Naalackersuisut aalajangiinerannut atatillugu Naalackersuisut pilersaarutip inaarutaasup imarisaanik allannguuteqartitsisinnaapput. Taamaalilluni Naalackersuisut § 16 imm. 2 naapertorlugu kommunalbestyrelsip pisinnaatitaaffi tigussavaat. Aalajangersakkamut tassunga nassuiaatit innersuussutigineqarput.

§ 12

Aalajangersagaq imarisamigut iluarsaanneqarluni nunaminertat atorineqartarnerat pilersaarusiortifigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 26-imik ingerlatitseqqiineruvoq, tassani pineqarluni Naalackersuisut kommunimut pilersaarummut tapiliussamik suliaqaqquisinnaanerit imaluunniit nammineerlutik kommunimut pilersaarusiortisinnaanerit.

Imm. 1-imut

Pilersaarusiortnermut killissanik aqutsineq, nuna tamakkerlugu pilersaarusiortneq aamma kommunimut pilersaarusiortneq pillugit aalajangersakkani aalajangersarneqartoq, kommunimut pilersaarusiortneq, ataatsimut isigalugu pilersaarusiortnermut akerliisumik ingerlanneqarsinnaanngitsoq killiliivoq. Aalajangersakkami matumani, illuliortiternerit sanaartornerillu annertunerusut aallartinneqarsinnaanissaannut, pisariaqartumik sukumiisumik pilersaarusiortnermik tunngavissaqalersitsinissamik Naalackersuisut aammattaaq periarfissaqarnissaat qularnaarneqarpoq.

Taamaalillutik Naalackersuisut pisuni immikkut ittuni, kommunalbestyrelsi sumiiffiup ilaani aalajangersimasumi kommunimut pilersaarummut tapiliussamik erseqqinnerusumik imarisassaanik taasillutik suliaqaqqullugu peqqusinnaavaat.

Imm. 2-imut

Pisuni aalajangersimasuni naleqqunnerusorinarpat Naalackersuisut nammineerlutik kommunimut pilersaarummut tapiliussamik suliaqartitsisinnaapput. Naalackersuisut kommunimi pilersaarusiortnermut oqartussaasut pisinnaatitaaffii tigussagunikkut, tassunga suleriaatsit atuuttut malinnissaat Naalackersuisut pisussaaffigaat.

§ 13-imut

Aalajangersagaq nutaajuvoq. Inatsisartut peqqussutaat nr. 6, 19. december 1986-imeersumi kapitali 5 aamma 6 naapertorlugit siusinnerusukkut kommunalbestyrelsit kommunimut pilersaarusiortnissamik kiisalu kommunimi sumiiffiit ilaannut ataasiakkaanut sukumiisumik aalajangersaaviummik illoqarfiup ilaanut pilersaarusiortnissamut pisussaaffeqarsimapput. Aalajangersakkap atuutilerneratigut aappaatigut kommunimut pilersaarutip ataatsimut isiginerullugu pilersaarusiortneqarnera aamma aalajangersagartai ataatsimut akuliutsinneqassapput,

aappaatigullu kommunip illoqarfiinut nunaqarfiinullu sumiiffinnut sukumiisumik maleruagassiisoqassalluni.

Imm. 1-imut

Kommunalbestyrelsi kommunimut pilersaarummik, maannakkut killiffimmik, anguniakkanut aamma sanaartorfissanik pilersaarusiornermut malittarisassanik nassuiaasumik suliaqarnissamut pisussaaffeqarpoq, ilanngullugu kommuneqarfimmi nunaminertat atorneqarneri.

Pilersaarusiornermi kommunimi suliarineqartumi taamaalilluni kommunip sanaartorfittut ineriartornissaanut tunngaviusut kiisalu aalajangersaanerit pillugit nassuiaasoqassaaq. Pilersaarusiorneq taamaattoq aningaasaqarnikkut naliliinernut kommunimilu isumalluutinik allanik atuinissamik isumaliutersuutitut ataqatigiisitseqqissaarluni suliarineqartariaqarpoq, ilanngullugu pisortat namminersortullu aningaasaliinerisa imminnut sunniuteqaqatigiinnerat.

Innuttaasunut inuussutissarsiutinullu ineriartortitsineri anguniakkat kommunip sanaartorfissanik pilersaarusiornerni tunngavissatut ilaapput. Tamatuma kingunerisaanik innuttaasunut inuussutissarsiutinullu ineriartortitsineri anguniakkat tunngavissat pingaarnepaat ilaattut, ataatsimoortumik naliliinernut, § 13-mi pilersaarutitut taaneqartunut tunngaviusussanut ilaatinneqartussatut taaneqarput.

Oqariaatsimi "pisortat suliaqarfiinut pilersaarusiorneq" suliaqarfinni ataasiakkaani kiffartuussinerup pitaassusissaa eqqarsaatigineqarpoq. Pisortat suliaqarfiinut pilersaarusiorneq qitiusumit (Naalagaaffik aamma Namminersornerullutik Oqartussat) sumiiffinnilu ataasiakkaani (kommunit ingerlatsivii) suliarineqartoq, aningaasatigut pilersaarusiornertuulli sanaartorfissanik pilersaarusiornermut ataqatigiisillugu ingerlanneqartariaqarpoq, ilaatigut pissutigalugu suliaqarfinnut pilersaarusiorneq nunaminertanik atuinermut sunniuteqartarmat, assersuutigalugu suliffeqarfiit, aqqusernit, teknikkikkut pilersuisoqarfiit il.il.

Imm. 2-imut

Kommunimut pilersaarut kommunalbestyrelsimi suliarineqartoq nassuiaataasumik immikkoortortaqaassaaq, pingaarnertut ilusilersugaassalluni, aalajangersakkanut immikkoortortaqaassalluni kiisalu kommunalbestyrelsip nunaminertanik atugassiisarnernut aalajangersakkanik immikkoortortaqaassalluni.

1) Immikkoortoq nassuiaataasoq amerlanertigut imaqartassaaq pilersaarussianut nassuiaammik, kommunip aningaasatigut sanaartorfissatigullu pilersaarusiornernata qanoq oqimaaqatigiinnerannik nassuiaaviusumik, suliaqarfinnut pilersaarussianik arlalinnik illoqarfinni nunaqarfinnilu ataasiakkaani innuttaasut amerlassusaasa ineriartornerannik nassuiaaviusunik, inuussutissarsiornernut ineriartorneranik, kommunimi isumaginninnermi paaqqinnittarfinnut killiffimmik nassuiaaviusumik, kulturikkut mernguersarnikkullu periarfissanik, kommunimi pilersuineritut

pissutsinik aammalu angallannermut pilersaarusionermik kiisalu kommunalbestyrelsip kommunip ineriartornissaanut anguniagaannut imaluunniit pingaarnersiunerannut nassuiaataasumik.

2) Kommunimut pilersaarutip pingaarnertut ilusiligaanerani kommunimi sanaartorfissanik pilersaarusionerq ataatsimut eqikkarneqassaaq. Aammattaaq pingaarnertut ilusiligaanermi illoqarfinnut ataasiakkaanut illoqarfimmut tunngatillugu atuuffiit, attaveqaqatigiinneq pingaarneq, illoqarfiup ilaani sumiiffinni aalajangersimasuni assigiinngitsuni nunaminertat atorneqarnerat pingaarneq kiisalu taakkua killilersorneqarnerat eqikkaaviumik pilersaarusionerqarsinnaapput.

3) Immikkoortumi aalajangersakkanik imaqtartumi sumiiffiup ilaani aalajangersimasuni ataasiakkaani aalajangersakkanik pingaarnernik aamma sukumiisunik aalajangersaasoqassaaq.

a) Aalajangersakkani pingaarnerni sumiiffiup ilaanni aalajangersimasuni nunaminertat atorneqarnissaannut, aalajangersakkat Naalakkersuisut isumaqatigiissuteqarfigineqarnerisigut imaluunniit innersuussinerisigut aalajangersarneqartut kiisalu pissutsit pilersaarusiap tunngaviumik imarisaannut tunngassuteqartut aalajangersarneqarsinnaapput. Tamatumunnga assersuutigineqarsinnaapput ineqarfiit, umiarsualiviit aamma inuussutissarsiorfiit, illoqarfiup qeqqata, sumiiffiit mernguersarfittut atorneqartussat aamma sumiiffiit pilersuineranut teknikkeqarfiit inissineqarfissaat killeqarfissaallu, killeqarfiit immikkut killeqarfeqartitassat aalajangersaavigineqarneri kiisalu eriagissat eqqissisimatitsivissallu pillugit aalajangersakkat.

b) Aalajangersakkat sukumiisut illoqarfeqarfiup annertussusissaanik inissisimaffissaanillu erseqqinnerusumik maleruagassanik imaqarsinnaapput, ilanngullugit assersuutigalugu sanaartorfissanik, aqqusineqarfissanik aqqusersuiffissanillu immikkoortitsineq, portussusissat ungasissusissallu kiisalu illut silataasa qanoq isikkoqarnissaat pillugit maleruagassat aamma sanaartorfissagissaanissamut attaviliisussaataaneq.

4) Kommunimut pilersaarummi nunaminertanik atugassiisarnissamut aalajangersakkani, nunaminertanik qinnuteqaatit suliarineqartarnerannut, sanaartukkap teknikkikkut aningaasaqarnikkullu piviusungortinneqarsinnaaneranut uppersaasiinissamut piumasaqaatinik il.il., aalajangersakkanik aalajangersaasoqarsinnaavoq.

Imm. 3-imut

Nuna tamakkerlugu pilersaarusionerq kommunimut pilersaarusionermut sinaakkutissaavoq. Taamaattumik kommunimut pilersaarut pilersaarusionermut tassunga akerliussanngilaq.

Aalajangersagaq nutaajuvoq aammalu makkuninnga siunertaqarluni: Siullermik politikikkikkut piginnittuunerup kommunalbestyrelsimut inissinneqarnissaa siunertarineqarpoq. Siunertarineqarpoq kommunalbestyrelsip qinigaaffiata aallartinnerani kommunimut pilersaarusernerup politikikkikkut naliliiffiqarneqatigit isummerfigineqarneqatigullu tamatuma pinissaa. Aappassaannik toqqaannartumik pilersaarusernissamut pisussaaffiliisoqarsimanngippat, tak. § 19, imm. 3, kommunimut pilersaarutip nammineerluni ingerlanneqartumik iluarsaanneqartarnissaanik qularnaarisumik peqqussummi aalajangersagaliortoqanngilaq. Taamaalilluni pilersaarusernissamut periaasissamik suliaqarnissaq pillugu aalajangersakkami siunertarineqarpoq, kommunalbestyrelsip akuttunngitsumik iluarsaassisoqartarnissaanut pisariaqartitsinermik nalilersuisarnissaata qularnaarneqarnissaa.

Imm. 1-imut

Kommunimut qinigaaffiup affaani siullermi kommunalbestyrelsi kommunip pineqartup kommunimut pilersaarusernissaanut periaasissamik suliaqassaaq.

Imm. 2-imut

Periaasissaq kommunip siusinnerusukkut pilersaarusernissamaneramik paasissutissanik imaqassaaq kiisalu kommunimut pilersaarut pioreersoq qanoq annertutigisumik iluarsaanneqassanersoq pillugu naliliinermik isummernermillu imaqassalluni.

Kommunalbestyrelsi makkuninnga qinigassaqarpoq:

- 1) Kommunalbestyrelsi naliliisinnaavoq kommunimut pilersaarut tamakkiisumik iluarsaanneqassasoq,
- 2) Kommunalbestyrelsi naliliisinnaavoq kommunimut pilersaarut sammisakkaartumik iluarsaanneqassasoq. Tamanna assersuutigalugu tassaasinnaavoq kommunimut pilersaarutip immikkoortuanik nassuiaataasumik imaluunniit taassuma ilaannik, kommunalbestyrelsip anguniagaannik imaluunniit kommunimut pilersaarummi nunaminertanik atugassiisarnermut aalajangersakkanik iluarsaassineq.
- 3) Kommunalbestyrelsi naliliisinnaavoq kommunimut pilersaarut nunami sumiiffikkaartumik iluarsaanneqassasoq. Tamatuma qinerneqarnerani amerlanertigit kommunimut pilersaarutip pingaarnertut ilusiligaanera iluarsaanneqartussaassaaq, assersuutigalugu sumiiffiup ilaanni aalajangersimasuni ataasiakkaani killiliinerit aammalu imminnut naleqqiullugit inissisimaffiliinerit, kommunimi angallannermut pilersaaruserneq aamma aqqutissat sukkoorfissaat.
- 4) Kiisalu kommunalbestyrelsi naliliisinnaavoq kommunimut pilersaarut iluarsaanneqartariaqanngitsoq. Kommunalbestyrelsip taamaalilluni nalilersinnaavaa kommunimut pilersaarut ilusimisut iluseqarluni atoqqinneqarsinnaasoq.

§ 15-imut

Aalajangersagaq oqaatsitigut aamma imarisamigut allannguuteqartinneqarluni nunaminertat atorineqartarnerat pilersaarusiortifigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 7-imik ingerlatitseqqiineruvoq. Aalajangersakkami pineqarpoq kommunimut pilersaarutissatut siunnersuutinik tamanut saqqummiussisarnissamik pisussaaffeqarneq. Oqaaseq "tamanut saqqummiussineq" kiisalu taassuma taamaaqatai paasineqassapput piffissami tusarniaaffiusumi kikkut tamarmik aammalu oqartussaasut kalluarneqartut peqataatinneqassasut. Oqariaaseq oqariaatsip "tusarniaaneq" isumaqataatut atorineqartarpoq. Oqaluttuarisaanermilu oqariaaseq "tamanut saqqummiussineq" pilersaarusiortnermut tunngatillugu inatsisitigut atorineqarsimavoq. Tamanna pissutigalugu oqariaatsip taassuma atorineqaannarnissaa toqqarneqarpoq.

Imm 1-imut

Aalajangersakkami kommunimut pilersaarutissatut siunnersuutit tamanut saqqummiunneqarnissaannut minnerpaamik piumasarineqartut aalajangersarneqarput. Aalajangersakkap tunuliaqutarivaa innuttaasut siunnersuutip oqalliseqataaffiginissaanut aammalu akerliliissuteqarnissamik allannguutissanillu siunnersuuteqarnissamik periarfissaqarnissaasa qularnaarneqarnissaa. Kommunalbestyrelsip kissaatigippagu, kommunimut pilersaarutissatut siunnersuutip kommunalbestyrelsimit atuutilertussangorlugu akuersissutigineqannginnerani tamanullu saqqummiunneqannginnerani, kommunimut pilersaarusiortnermut apeqqutinut pingaarnernut tunngatillugu tamanut oqallitsitsisoqarsinnaavoq.

Imm. 2-imut

Aalajangersakkami siunertarineqarpoq ikinnerussuteqartut isummernerisa kommunimut pilersaarutissatut siunnersuummut atatillugu saqqummiunneqarnissaannik, taamaalillunilu innuttaasut oqalliseqataaneranni ilaatinneqarnissaannik, qularnaarinissaq.

Imm. 3-imut

Kommunimut pilersaarutissatut siunnersuut kommunimi sumiiffinni tulluurtuni arlalinni minnerpaamik sapaatit akunnerini 12-ni tamanit takuneqarsinnaassaaq. Tusarniaanermut piffissarititaasup sivisussusissaa pillugu aalajangersakkami minnerpaamik piumasaqaat aalajangersarneqarpoq. Tamanut saqqumtitsinissamik piffissaliussap sivisussusissaata aalajangersarneqarnerani, kommunimi pilersaarusiortnermut oqartussaasut, aammattaaq sulinngiffeqarnerit ullullu nalliuttut eqqarsaatigisariaqarpaat.

Pilersaarutissatut siunnersuutip kommunip nittartagaani aamma/imaluunniit qarasaasiaq atorlugu nunami sumiiffinnut tamanut paasissutissanik katersuiffimmi saqqummiunneqartussaanerata saniatigut, pilersaarutissatut siunnersuut kikkunnit

tamanit takuneqarsinnaasunngortinneqassaaq, assersuutigalugu kommunip allaffiani, nunaqarfimmi allaffimmi, najukkami atuakkanik atorniartarfimmi, kommunip nivinngaaviani il.il.. Inuit arlaannit kissaatigineqarpat pilersaarusionermut paasissutissat kommunalbestyrelsimit tunniunneqassapput.

Aalajangersakkami kikkunnut tamanut takusassiinissamut piffissarititaasup sivikinnerpaaffissaatut piumasagaat pilersaarutissatut siunnersuuteqarnermi eqquutsinneqarnersoq pillugu apeqqut apeqqutaavoq inatsisinut tunngasoq, § 36, imm. 2 malillugu naammagittaalliuutigineqarsinnaasoq. Kikkunnut tamanut takusassiinissamut piffissarititaasup sivisussusaani sivikinnerpaaffissaatut piumasagaat unioqquutinneqarsimappat, tamanna kommunimut pilersaarutip imaluunniit kommunimut pilersaarummut tapiliussap pineqartup atortussaangitsutut isigineqartussaangorneranik kinguneqartussaasussaavoq.

Imm. 4-imut

Oqaaseqaateqarnissamut akerliliissuteqarnissamullu piffissarititaasoq tamanut saqqummiussinermi ersissaaq. Tamanna pigajuttarpoq tusarniaanermi piffissarititaasoq pilersaarutissatut siunnersuummut ilanngunneqarneratigut.

Imm. 5-imut

Siunnersuut pillugu innuttaasunik oqallitsitsilernissaq siunertaralugu kommunalbestyrelsi paasititsiniaanermik ingerlatsissaaq. Paasititsiniaaneq tamanna naleqqunnerpaamik qanoq pisinnaassanersoq kommunalbestyrelsip nammineeirluni aalajangissavaa. Assersuutigalugu tamanna pisinnaavoq quppersakkanik agguaassinikkut, innuttaasunik ataatsimiisitsinikkut, najukkami tusagassiuutit radio/TV il.il. aqqutigalugit, kommunip nivinngaaviini allagarsiinikkut il.il. Taamaattorli kommunalbestyrelsip minnerpaamik pilersaarutissatut siunnersuut kommunip nittartagaatigut aamma/imaluunniit qarasaasiaq atorlugu nunami sumiiffinnut tamanut paasissutissanik katersuiffikkut, tak. § 4, saqqummiutissavaa.

Imm. 6-imut

Kommunimut pilersaarutissatut siunnersuutip kommunimi innuttaasunut saqqummiunneqarneranut peqatigitillugu siunnersuut Naalackersuisunut oqartussanullu allanut siunnersuutip immikkut pingaaruteqarfigisaattut nalilerneqartunut nassiunneqassaaq. Tamatumuuna siunertaavoq Naalackersuisut kommunalbestyrelsip pilersaarusionermi isumaliutersuutaannik siusissukkut ilisimaarinnilernissaannik qularnaarinissaq. Taamaalillutik Naalackersuisut piffissaq tamanut saqqumtitsiffiusoq naatinnagu oqaaseqarnissaminnut periarfissaqassapput.

Pilersaarutissatut siunnersuutip "tamanut saqqummiussinerup peqatigisaanik" Naalackersuisunut aamma oqartussanut kommunimut pilersaarutissatut siunnersuutikkut immikkut sunniuteqarfigineqartussanut nassiunneqartussaanerata malitsigisaanik, nassiussinngitsoornermi imaluunniit kingusinaartumik nassiussinermi, § 16 naapertorlugu siunnersuutip inaarutaasumik kommunalbestyrelsimit akuersissutigineqarsinnaanissaanut, imm. 3 naapertorlugu

piffissarititaasoq oqartussaasunut pineqartunut tunngatillugu taamaaqataanik sivitsorneqassaaq.

Imm. 7-imut

Kommunalbestyrelsi pilersaarusiamik tunniussinerminut akitsuummik akiliisitsisinnaavoq. Akitsuutip annertussusaa siunnersuummik suliaqarnermut atatillugu aningaasartuutaasimasunit annertunerussanngilaq aammalu naqitertinnissaanut qanoq akeqarsimaneranut naleqqiullugu naapertuutissalluni.

§ 16-mut

Aalajangersagaq oqaatsitigut aamma imarisamigut allannguuteqartinneqarluni nunaminertat atorneqartarnerat pilersaarusiortifigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 8-imik ingerlatitseqqiineruvoq.

Imm. 1-imut

Tamanut saqqummititsinissamut piffissaliussap naanerata kingorna kommunalbestyrelsip pilersaarutissatut siunnersuut suliareqqillugu inaarutaasumik akuerisinnaavaa. Tamatumunnga atatillugu kommunalbestyrelsi piffissaq eqqorlugu oqaaseqaatinut/akerliliissutinut tiguneqarsimasunut isummissaaq.

Imm. 2-imut

Kommunalbestyrelsip tassunga atatillugu siunnersuut saqqummiunneqarsimasooq allanngortissinnaavaa. Allanguutit pingaaruteqannginnerusut tamanut tusarniaasoqaqqinngikkaluartoq kommunalbestyrelsimit suliarineqarsinnaapput. Attuumassuteqartut allanguutinut toqqaannartumik kalluarneqartut ilisimatinneqassasut kommunalbestyrelsi aalajangiisinnaavoq. Tamannali piumasagaataanngilaq. Allanguutit pingaaruteqarpata kommunalbestyrelsip siunnersuut akerliliissuteqarnissamut sapaatit akunnerinik sivikinnerpaamik 6-nik piffissalerlugu tamanut saqqummiuteqqissavaa.

Allanguutit saqqummiuteqqinneqartariaqarnersut naliliinermi, allanguutinik ilisimaarinnilernissamut periarfissaqarnissaq innuttaasunut soqutiginaateqarnersooq aallaavigineqassaaq. Allanguutit pilersaarutaaqqaartup tunngaviatigut imarisaanut akerliusut, assersuutigalugu sumiiffiup ilaani aalajangersimasumi atuinissamik aalajangersakkanik, nunami sumiiffimmi killeqarfinnut, sumiiffiup initussusianik allanguinerit kiisalu illuliortiternermut malittarisassiisunik aalajangersakkanik allanguinerit taamaalilluni tamanut saqqumitinneqaqqinnissaat pisariaqassaaq. Taakkua pissutsinik pisimasinnaasunik tamakkiisuusutut isigineqanngillat, allanik annertuutut isigineqartariaqartunik, taamaattumillu pilersaarutissatut siunnersuutip tamanut saqqumiteqqinneqarnissaanik pisariaqartitsiviusunik pisoqarsimasinnaammat. Tamatumunnga pilersaarutissatut siunnersuummut tunngatillugu pisuni ataasiakkaani naliliineq apeqqutaassaaq.

§ 17-imut

Aalajangersakkami imm. 1-imi aamma 2-imi oqaatsitigut aamma imarisamigut allannguuteqartitsisoqarluni nunaminertat atorneqartarnerat pilersaarusionsiorfigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 27-imik ingerlatitseqqiinerupput. Aalajangersakkami imm. 3, pilersaarutip tamanut saqqummiunneqartup qarasaasiaq atorlugu nunami sumiiffinnut tamanut paasissutissanik katersuiffimmut nalunaarutigineqarnissaanik pisussaaffeqarnermut tunngasoq nutaajuvoq aammalu qitiusumik pilersaarusionut isaaffimmik pilersitsisoqarnissaanik qularnaarilluni. Aalajangersakkami imm. 4 nutaajuvoq, siunertaralugu pilersaarutissatut siunnersuutit § 16 naapertorlugu inaarutaasumik akuersissutigineqartut aamma tamanut nalunaarutigineqartarnissaasa qularnaarneqarnissaa, taamaalilluni kikkut tamarmik pilersaarutip imarisaa pillugu paasinninnissaminnut periarfissinneqassallutik.

Imm. 1-imut

Kommunalbestyrelsip pilersaarutip inaarutaasumik akuersissutigineqareernerani, pisariaqanngitsumik kinguarsaanertaqanngitsumik, kommunimut pilersaarummik nalunaarut tamanut saqqummiutissavaa. Siunnersuummut tamanut saqqummiunneqarsimasumut naleqqiullugu allannguuteqartitsisoqarsimanersoq nalunaarummi takuneqarsinnaassaaq.

Imm. 2-imut

Kommunimut pilersaarutissatut siunnersuutip tamanut nalunaarutigineqarneranut peqatigitillugu kommunimut pilersaarutissatut siunnersuut Naalakkersuisunut aamma oqartussanut siunnersuut immikkut pingaaruteqartitsiviusunut nassiunneqassaaq. Taakkua tassaagajussapput oqartussat § 15, imm. 6 naapertorlugu tamanut saqqummiussinermut atatillugu pilersaarutissatut siunnersuummik nassiussivigineqartut.

Imm. 3-imut

Pilersaarutip tamanut nalunaarutigineqarneranut atatillugu pilersaarutip qarasaasiaq atorlugu nunami sumiiffinnut tamanut paasissutissanik katersuiffimmut nalunaarutigineqarnissa kommunalbestyrelsip pisussaaffigaa.

Imm. 4-imut

Nunami sumiiffimmut pineqartumut ataatsimut kommuni arlalinnik qinigassiilluni pilersaarutissatut siunnersuusionsinnaavoq. Tamanut nalunaaruteqarnissamut piffissaliussisoqanngippat tamatuma kingunerissavaa, qanoq inatsisitigut sunniutaagallartut atuutissanersut, pilersaarut tunngavissaq sorleq atuuttussatut naatsorsuutigineqassanersoq kiisalu maleruagassiinerit suut tassani aalajangersarneqarsimanersut pillugit innuttaasut ilisimaarinnilersinnaanngillat.

Pilersaarutissatut siunnersuutip tamanut nalunaarutigineqarnissaanut piffissaliussinermi qulakkeerniarneqarpoq, pilersaarutissatut siunnersuut kommunalbestyrelsip inaarutaasumik akuersinerata kingorna kingusinnerpaamik sapaatit akunneri 12-it qaangiunneranni tamanut nalunaarutigineqanngippat pilersaarutissatut siunnersuut atorunnaassasoq.

§ 18-imut

Aalajangersagaq oqaatsitigut allannguuteqartinneqarluni nunaminertat atorneqartarnerat pilersaarusiortfigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 11, imm. 1-imik aamma 2-imik ingerlatitseqqiineruvoq.

Kommunimut pilersaarusiortneq tassaavoq pilersaarusiortnermik suliaqarneq ingerlaavartuq. Taamaattumik kommunalbestyrelsi pisussaavoq, pilersaarutit tunngaviusussat pisoqalinnginnissaat imaluunniit amigalinnginnissaat eqqarsaatigalugu, pisariaqartinneqarpat kommunimut pilersaarut nutartertassallugu.

Oqariaatsimut "pisariaqalernerani" tunngatillugu kommunalbestyrelsimit ataasiakkaatigut naliliineq apeqqutaassaaq. Peqqussut pilersaarusiortnerup inatsisitigut aalajangersakkamik kaaviiartumik ingerlanissaanut aalajangersakkanik imaqaanngilaq. Taamaattumik piffissap ingerlanerani kommunimut pilersaarummi qulequtakkaartumik aammalu nunami sumiiffikkaartumik allannguinerpassuit pilersinnaapput.

Imm. 2-imut

Tamakkiisumik paasiuminartitsiinnarnissaq eqqarsaatigalugu, annertuunik allannguuteqartitsereernermi, pilersaarutit tunngaviusussat atuuttut ataatsimoortunngorlugit allassimalersinnissaat kommunalbestyrelsip pisussaaffigaa. Ataatsimoortunngorlugit allassimalersitsinermi pilersaarusiortnermut oqartussat, pilersaarutit tunngaviusussat atuutilernerisa kingorna nuna tamakkerlugu pilersaarusiortnermut malitassiaasimasinnaasut eqqarsaatigissavaat.

Allannguutit annertunerisut pineqarneranni tamanna paasineqassaq tassaasut assersuutigalugu illoqarfiup ilaani nutaami porsaanerit, suliffeqarfinnik angisuunik tunngaviatigut illoqarfimmi inuussutissarsioriaatsimik allannguisunik sanaartorerit, innuttaasut amerlassusaanni ineriartornermi allannguutit annertuut, inissianik, pisortani paaqqinniffinnik, pisiniartarnissamut periarfissanik assigisaannillu pisariaqartitsinermut sunniuteqartut.

Ataatsimoortunngorlugit allassimalersitsineq kommunimut pilersaarutaaqqaartutulli aammalu tassunga atasumik kommunimut pilersaarummut tapiliussatulli inatsisitigut inissisimannngilaq. Taamaattumik allaffissornikkut ataatsimoortunngorlugit allassimalersitsinerit inatsisitigut tunngavigineqarsinnaanngillat.

§ 19-mut

Aalajangersagaq najoqqutassatigut ataasiakkaanik allannguuteqartinneqarluni, nunaminertanik atuineq aamma pilersaarusiorneq pillugit Inatsisartut peqqussutaat nr. 6, 19. december 1986-imeersumi § 16-imut assinguvoq.

Imm. 1-imut

Aalajangersakkami pineqarpoq kommunalbestyrelsip pilersaarusiorsinnaatitaanera. Aalajangersagaq tamanna naapertorlugu kommunalbestyrelsi sumiiffiup ilaani aalajangersimasumi sukumiisunik maleruagassaqaalernissaanut sukkulluunniit nammineerluni suliniuteqarsinnaavoq, tamatumalu malitsigisaanik qaqugukkut maleruagassat sukumiisut suliarineqassanersut kommunalbestyrelsi nammineerluni aalajangiisinnaasoq pingaarnertut maleruagassaavoq.

Pilersaarutit kommunalbestyrelsip ingerlaavartumik pilersaarusiornermik suliaqarnissaq tunngavigalugu suliarisassai tassaapput sanaartorfissanik pilersaarutit paasiuminartut, tassalu pilersaarutit pingaartumik kommuneqarfimmi nunaminertat atorineqarnissaannik aammalu illuliortitertarnissat pillugit aalajangersaaffiusut.

Nunaminertanik atuinissamut sukumiisumik maleruagassiineq nunaminertanik atugassiiarnermut piumasaqaatinik atugassarititaasussanillu aalajangersaanikkut pisinnaavoq. Maleruagassiineq taanna sumiiffiup ilaannut aalajangersimasunut ataqatigiinnut annertunernut aalajangersakkanik aalajangersaanermi naleqqunnerpaasussaavoq.

Siunertaavoq siunissami sukumiisumik pilersaarusiorneq sumiiffimmut pilersaarusiornermi (najukkamut pilersaarut) allaanerusumik ingerlanneqarsinnaasasoq. Taarsiullugu sukumiisumik pilersaarusiorneq, sumiiffimmut immikkoortuni ataasiakkaani tamani aalajangersakkat maleruagassiisut, siunissami kommunimut pilersaarutip ilaatut ilanngullugit, ingerlanneqartalissaaq.

Imm. 2-imut

Aalajangersakkani kommunalbestyrelsip kommunimut pilersaarusiornerep piviusunnngortinnissaata qularnaarneqarnissaanut sakkussatut, sukumiisumik pilersaarusiornissamut pisinnaatitaanera pisussaataitaneralu pillugit maleruagassiisoqarpoq.

Imm. 3-imut

Aalajangersakkami imm. 3 qitiusutut aalajangersagaavoq, tassani kommuneqarfimmi kommunip maleruagassiortarnissaanik qularnaarinissamik kissaateqarneq tunngaviulluni, ilanngullugu nunaminertanik atuinissamut sukumiisunik maleruagassiinermi innuttaasut sunniuteqaqataatinneqarnissaat. Aalajangersakkap peqqussummi 1986-imeersumi § 16-imi aalajangersagaq maannamut atuussimasoq

assigaa aammalu kommunimut pilersarusiortarneq pillugu maleruagassanut, nalunaarutini immersuiffiusussani takuneqarsinnaasussanut ataqatigiissillugu isigineqassalluni, tassani ilaatigut pilersarusiornermi innuttaasut peqataatinneqartarnissaat pillugu maleruagassanik erseqqinnerusunik aalajangersaasoqassalluni.

Kommunalbestyrelsip nunaminertamik atugassinneqarnissamik qinnuteqaat, sukumiisunik aalajangersagaqannginnera, tak. § 13, im. 2 nr. 3, litra b, imaluunniit aalajangersaasoqartussaannnginnera innersuussutigalugu itigartissinnaanngilaa. Qinnuteqaat kommunimut pilersaarummi aalajangersakkanut tamakkiisumik naapertuuppat kommunalbestyrelsip, tamanna sanaartugassap naammassinissaanut pisariaqarpat, sumiiffiup ilaanut aalajangersimasumut sukumiisunik aalajangersagaliornissaq pisariaqanngitsumik kinguarsaanertaqanngitsumik aallartissavaa.

Aalajangersakkalli qinnuteqartoq/sanatitsisoq qularnaariffigisinnaanngilaa, pilersaarutissatut siunnersuut kommunalbestyrelsimit inaarutaasumik akuerineqassanersoq imaluunniit pilersaarut kissaatigisaatut imaqaassanersoq.

Qinnuteqarnermi piffissaq nunaminertanik piorsaanissamut tulleriinnilersuinermut kommunimut pilersaarummi allassimasumut naapertuutinngippat, kommunalbestyrelsi sumiiffiup ilaani aalajangersimasumi sukumiisunik aalajangersagaliornissap aallartinnissaanik pisussaaqqeqanngilaq.

Aalajangersakkap imarisaa annertusisaavoq, tak. § 27, tassani nunaminertanut oqartussaaffik kommuninut tunniunneqarpoq, taamaalilluni kommunini pilersaarutitut pisinnaatitaaffimmi pisussaatitaaffimmilu siunissami aamma nunaannarmi kommunimi nunaminertat ilaasussanngorlutik. Naatsorsuutigineqarpoq sumiiffiup ilaanut aalajangersimasumut pilersarusiornissamik pisussaaqqeq aatsaat atuutilissasoq, illuliornissaq pilersaarutaasoq aalajangersakkanut atuuttunut akerliuppat imaluunniit sumiiffiup ilaata aalajangersimasup isikkuanik allannngortitsissatut naatsorsuutigineqarpat. Illuaqqanik piniariartarfinnik sunngiffimmilu ornittagassanik ataasiakkaanik nunaannarmi pilersitsinerit imaluunniit illunik pioreersunik annikinnerusumik allilerinerit taamaalillutik pilersarusiortussaataalersitsissanngillat.

Imm. 4-imut

Aalajangersakkami aalajangersarneqarpoq sumiiffiup ilaannut aalajangersimasunut ataasiakkaanut aalajangersakkat, § 13 naapertorlugu pilersarusiat kommunimut pilersarusiornermut tunngavigisaannut imarisaanullu naapertuuttumik imaqartinneqassasut.

§ 20-mut

Aalajangersagaq oqaatsitigut allannguuteqartinneqarluni nunaminertat atorneqartarnerat pilersarusiorfigineqartarnerallu pillugit Namminersornerullutik

Oqartussat nalunaarutaat nr. 23, 18. november 1992-imeersumi § 11, imm. 2-imik ingerlatitseqqiineruvoq. Tassunga atatillugu erseqqissarneqarpoq tamanut saqqummiussinissamut imm. 2 malillugu piffissaliussaq, aatsaat pilersaarutissatut siunnersuummi sumiiffiup ilaani aalajangersimasoq ataaseq pineqarpat sapaatit akunnerinut 6-inut sivikillineqarsinnaasoq.

Imm. 1-imut

Aalajangersakkami aalajangersarneqarpoq, kommunimut pilersaarummut tapiliussamik suliaqarnermut periaasissaq kommunimut pilersaarusiornissamut periaatsip assigigaa. §§ 15-imit 17-imut nassuiaatit takukkit.

Imm. 2-imut

Kommunimut pilersaarummut tapiliussaq sumiiffiup ilaanut aalajangersimasumut ataasiinnarmut tunngasuuppat tusarniaanermut piffissaliussaq sapaatit akunneri 12-niit 6-inut sivikillineqarsinnaavoq.

Tusarniaanermut piffissarititaasup sivisussusissaa aalajangersakkami minnerpaamik piunasaqaatit aalajangersarneqarpoq. Tamanut saqqumititsinissamik piffissaliussap sivisussusissaata aalajangersarneqarnerani kommunimi pilersaarusiornermut oqartussaasut aammattaaq sulinngiffeqarnerit ullullu nalliuttut eqqarsaatigisariaqarpaat. Pilersaarutissatut siunnersuutip aalajangersakkami minnerpaamik piunasaqaat eqquutsinngippagu, tamanna pilersaarutissatut siunnersuutip pineqartup atuuttussaangitsutut isigineqartariaqarneranik aallaaviatigut kinguneqassaaq.

Imm. 3-imut

Kommunimut pilersaarummut tapiliussaq pilersaarutip siunertaanik inatsisitigullu sunniutaannik imaqassaaq. Aalajangersakkami siunertarineqarpoq innuttaasut kommunimilu ingerlatsivik pilersaarutissatut siunnersuutip anguniagaanut kingunissaannullu paasinnilluarsinnaanissaat. Tapiliussami aalajangersakkat nassuiarnissaat nalornissutigineqassagaluarpat, siunertap allaaserineqarnera kommunimut pilersaarummut tapiliussap nassuiarnissaanut tunngaviusinnaassaaq.

§ 21-mut

Aalajangersakkami imm. 1 nunaminertat atorineqartarnerat pilersaarusiornifigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 10-imik ingerlatitseqqiineruvoq, aalajangersakkami imm. 2 nutaajulluni. Imm. 2-imi erseqqissarneqarpoq kommunimut pilersaarummi aalajangersakkanut immikoortortaq kisimi innuttaasunut inatsisitigut pisussaaffiliisoq.

Imm. 1-imut

Aalajangersakkami aalajangersarneqarpoq kommunimut pilersaarutip piviusunnagortinneqarnissaanik suliniuteqarnissaq kommunalbestyrelsimut nalinginnaasumik pisussaaffiusoq. § 30 naapertorlugu immikkut ittumik akuersisoqarsimatinnagu, qinnuteqaatigineqartoq kommunimut pilersaarummut akerliuppat nunaminertamik atugassiiumannnginnissaq kommunalbestyrelsip pisussaaffigaa.

Aalajangersakkap atuutilerneratigut siunissami nunaminertanik, illuliassanik sanaartugassanillu aalajangiussinerit kommunimut pilersaarummut naapertuuttussaapput. Kisiannili aalajangersakkap atuutilerneratigut pilersaarummi aalajangersakkat naapertorlugit illuliornissamik sanaartornissamillu pisussaaffiliisoqanngilaq. Assersuutigalugu kommunalbestyrelsi naluttarfiliornissamik imaluunniit naluttarfimmuut aningaasaliinissamik pisussaaffeqanngilaq, kommunimut pilersaarummi nunaminertaq/sumiiffiup ilaa aalajangersimasoq siunertamut tassunga atugassanngortinneqaraluarpuunniit.

Imm. 2-imut

Aalajangersakkami aalajangersarneqarpoq kommunimut pilersaarutip aalajangersakkanut immikkoortua, tak. § 13, imm. 2 nr. 3, ilanngullugit sumiiffiup ilaanut aalajangersimasumut ataatsimut aalajangersakkat nalinginnaasut aamma aalajangersakkat sukumiisumik maleruagassiiusut, § 30 naapertorlugu immikkut ittumik akuersissuteqartoqarsimatinnagu, innuttaasunut pisussaaffiliisut.

§ 22-mut

Aalajangersagaq imarisamigut allannguuteqartinneqarluni nunaminertat atorneqartarnerat pilersaarusiortfigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 29-imik ingerlatitseqqiineruvoq.

Aalajangersakkami kommunimut pilersaarummi aalajangersakkat erniinnartumik pisussaaffiliinerat aalajangersarneqarpoq, imatut paasillugu siunissami atugassiiinerit pilersaarummut akerliussanngitsut. Inatsisinut naapertuuttumik illuliat pioreersut imaluunniit inatsisinut naapertuuttumik atuinerit, pilersaarutissatut siunnersuutip tamanut saqqummiunneqarnerata siornatigut pilersinneqarsimasut aammalu matumunnga naapertuutinngitsut, siornatigutut ingerlaannarsinnaapput. Sumiiffiup ilaanut aalajangersimasumut aalajangersakkat nutaat, pissutsit inatsisinut naapertuuttut pioreersut allanngortinnissaannut pilersaarummut naapertuuttumik iliuuseqarnissamik pisussaaffiliinngillat. Piginnittut nikinnerat aamma pissutsinik pioreersunik allanngortitsisinnaatitaanermik kinguneqassanngilaq.

Pilersaarutip inatsisitigut sunniuteqalereernerata kingorna illuliorneq imaluunniit illup atorneqarneranik allannguneq, § 30 naapertorlugu immikkut ittumik akuersisoqarsimanngippat, pilersaarusiortumut naapertuuttumik suliarineqassaaq. Pilersaarummi piginnittup imaluunniit atuisussap siunissami suliarerusutamisut aalajangiussineri kisimik maleruagassiorneqarput. Kisiannili sumiiffiup ilaanut

aalajangersimasumut aalajangersakkani piginnittumut imaluunniit atuisussamut piffissamut pereersumut atuuttussamik iliuseqartussaaffiliisumik aalajangersaasoqarsinnaanngilaq, assersuutigalugu najukkamut pilersaarummi pineqartut illuliortiternissat, sanaartukkanut ataatsimoorussanut il.il. attaviliisussaaitaanerit naammassinissaannut.

§ 23-mut

Aalajangersagaq imarisamigut allannguuteqartinneqarluni nunaminertat atorqeartarnerat pilersaarusiortifigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 28-imik ingerlatitseqqiineruvoq.

Imm. 1-imut

Aalajangersakkami kommunimut pilersaarutip inatsisitigut sunniuteqarallarnissaa pineqarpoq. Inatsisitigut sunniuteqarnerit taakkua § 23 naapertorlugu pilersaarutissatut siunnersuutip tamanut saqqummiunneqarneraniit atuutilissapput, taamaalilluni piffissaq taanna aallarnerfigalugu pilersaarummik inaarutaasumik sioqqutsiniaasutut isikkoqarsinnaasumik iliuseqartoqarsinnaanani. Tamatumunnga tunngaviuvoq pilersaarusiortierup ingerlanerani innuttaasut peqataatinneqarnissaat pingaartinneqarluinnarmat. Taamaattumik kikkut tamarmik peqataatinneqarnissaannut § 15, imm. 3 naapertorlugu piffissaliussap naanissaata tungaanut nutaanik illuliortiternissamut imaluunniit atuinermik allannguissamik il.il. inerteqquteqarallarnek atuutissappat naleqquttuursorineqarpoq.

Taamaattorli akuersissutit aamma immikkut ittumik akuersissutit pilersaarutissatut siunnersuutip tamanut saqqummiunneqarnerata siornatigut akuersissutigineqarsimasut atuutiinnassapput. Nunaminertanut oqartussat tamanut saqqummiussinerup siornatigut nunaminertamik atugassiisimatillugit tamanna tunngavigalugu sanatitsisoq taamatuttaaq, illuliornissaq eqqarsaatigineqartoq sumiiffiup ilaanut aalajangersimasumut pineqartumut aalajangersakkanut nalinginnaasumik imaluunniit sukumiisumik maleruagassiisunut akerliusimappat, sanaartornissamut akuersissummik piumasaqarsinnaanngilaq.

Imm. 2-imut

Kommunalbestyrelsi piffissaq tamanut saqqummiussiffiusoq naaniariartoq, pissutsinik pilersaarutissatut siunnersuummut naapertuuttunik aalajangiussinissamut/pilersitsinissamut akuersissuteqarnissaminnut periarfissaqarput. Tamatumani piumasaqaataavoq pilersaarutissatut siunnersuummut pineqartumut akerliliissutinik tigusaqartoqarsimassanngitsoq. Oqaaseqaateqarnissamut akerliliissuteqarnissamullu piffissarititaasup naareernerani Naalakkersuisut nuna tamakkerlugu pilersaarusiortiermut soqutiginaatilinnik qulakkeeriniarlutik oqaaseqaateqarnissaminnut akerliliissuteqarnissaminnullu periarfissaqareersimassapput. Aammattaaq siunnersuutip inaarutaasumik akuersissutigineqarnissaa naatsorsuutigineqarnerisooq nalilerneqarsinnaalersimassaaq.

Imm. 3-imut

Inatsisitigut sunniutaagallartussat, tak. imm. 1 aamma 2, siunnersuutip tamanut saqqummiunneqarnerata kingorna sivisunerpaamik ukiumi ataatsimi atuutsinneqarsinnaapput. Aalajangersakkami siunertarineqarpoq, pilersaarutissatut siunnersuutit tamanut saqqummiunneqartut akerliliissuteqarfigineqarsimanngitsut, inaarutaasumik akuersissutigineqarnissaasa tamanullu nalunaarutigineqarnissaasa qulakkeerneqarnissaat. Pilersaarutissatut siunnersuut inaarutaasumik kommunalbestyrelsimit akuersissutigineqanngikkuni qaqugukkut atorunnaartassanersoq pillugu peqqussummi piffissamik killiliussisoqanngilaq. Taamaalilluni kommunalbestyrelsip pilersaarutissatut siunnersuummik qanoq sivisutigisumik inatsisitigut sunnuteqarallartitsisinaanera ukiumut ataatsimut killiligaavoq aammalu sivitsorneqarsinnaanani.

§ 24-mut

Aalajangersakkami inatsisinik tunngaveqartumik akuersissutinik/aalajangiussinissamik akuersissuteqarnissamut, kommunimut pilersaarummi imaluunniit kommunimut pilersaarummut tapiliussami aalajangersakkatigut pinngitsoortinneqarsinnaasunut, piffissami aalajangersimasumi inerteqquteqarsinnaaneq pineqarpoq. Aalajangersagaq nunaminertanik atuineq aamma pilersaarusiorneq pillugit Inatsisartut peqqussutaat nr. 6, 19. december 1986-imeersumi § 18-imut tunngaviatigut assinguvoq.

Imm. 1-imut

Inerteqquteqarneq aatsaat suliassatut aalajangiussaq inatsisinut naapertuuttumik aallartinneqarsimanngippat pisinnaavoq. Illuliornissamut suli aallartinneqarsimanngitsumut, kisiannili atuuttumik kommunimit sanaartornissamut akuersissuteqarfigineqarsimasumut inerteqquteqartoqarsinnaanngilaq. Taamatuttaaq kommuni piginnaatitaaffeqartumut kingusinnerusukkut sanaartornissamut akuersissuteqarfigineqartussatut atorunnaarsinneqarsinnaanngitsumik neriorsuinertalimmik nunaminertamut pineqartumut nunaminertamik atugassiissuteqareersimappat, aalajangersagaq manna naapertorlugu kommuni inerteqquteqarsinnaanngilaq.

Inerteqquteqarneq sanaartugassamut *aalajangersimasumut* tunngatinneqassaaq aammalu suliassanik suliarinnittarneq pillugu inatsimmi tunngavilersuinissamik piimasaqaat naapertorlugu pissutsit soriataat inerteqquteqarfigineqarnersut erseqqissaanertaqartariaqarluni. Taamaalilluni inerteqquteqarnermi pisut imaluunniit pissutsit inerteqquteqarfigineqartut pinngitsoortinneqassapput, kisiannili illuliornernik/sanaartornernik suliqaarneq, pilersaarummut tunngaviusumut naapertuuttumik ingerlanneqartoq pinngitsoortinneqassanani.

Imm. 2-imut

Inerteqquteqarneq inerteqquteqarnerup tamanut nalunaarutigineqarneranit naatsorsukkamik sivisunerpaamik ukioq ataaseq atuussinnaavoq. Ukiup ataatsip piffissaliussap iluani kommunalbestyrelsi nutaamik pilersaarummik tunngaviusussamik suliaqartitsinissamut periarfissaqarpoq. Taamatut pisoqartillugu pilersaarutissatut siunnersuut tamanut saqqummiunneqarsimasoq inatsisitigut sunniuteqarallartinneqassaaq, tak. § 23.

§ 25-mut

Aalajangersagaq nunaminertanik atuneq aamma pilersaarusionerq pillugit Inatsisartut peqqussutaat nr. 6, 19. december 1986-imeersumi § 15-imik ingerlatitseqqiineruvoq. Peqqussutip matuma atuutilerniariarnerani kommunit, tamatuma tungaanut inatsisitigut aalajangigaasimasup saniatigut pilersaarusionerqullugit peqquneqarnissaat naleqquttuorineqanngilaq. Taamaattumik aalajangersakkami Naalakkersuisut kommunalbestyrelsimut isumaqatiginninniarnermikkut annertusisamik pilersaarusionerqussaatitaanerup naammassineqarnissaanut piffissaliussanik aalajangersaanissaat periarfissinneqarpoq.

Aalajangersagaq kommuninut maannakkut atuuttunut 1990'ikkut qiteqqunneranni kommuninut pilersaarutini tulleriiaani siulliit arlallit suliarineqarnerannut atatillugu atorneqarsimavoq.

§ 26-mut

Aalajangersakkami imm. 1, 2 aamma 3, nunaminertat atorneqartarnerat pilersaarusionerfigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 32-imik ingerlatitseqqiinerupput, aammalu aalajangersakkami imm. 4 nutaajulluni.

Imm. 1-imut

Nunaminertamik illuliortiterfissatut, allanik aalaakkaasunik ikkussuiffissatut allatulluuniit nunaminertaq kikkut tamarmik nalinginnaasumik atuisarnerattut atorneqanngitsoortillugu atuissagaanni, nunaminertanut oqartussaasut akuerseqqaarsimanissaat piumasaqaataavoq. Oqaaseqatigiinni taakkunani aamma nunap naggorissagassatut atorneqarnissaa pineqarpoq.

Imm. 2-imut

Aalajangersakkami aalajangersarneqarpoq nunaminertap pineqartup atorneqarnera allanngortinneqassappat tamatuma nunaminertanut oqartussanit akuerineqarsimanissaa pisariaqartoq.

Imm. 3-imut

Aalajangersakkami imm. 3-imi aalajangersarneqarpoq nunaminertamut atuisussaataanerup allamut tunniunneqarnera nunaminertanut oqartussanit akuerineqaqqaassasoq.

Peqqussummi aaqqissuussineq imaappoq, kinaluunniit nunaminertamik aalajangersimasumik, nunaminertap nalinginnaasumik atorneqarnissaanit allaanerusumik atuinissaminik qularnaarinissamik kissaateqartoq, tamatigut nunaminertanik ingerlatsisutut oqartussaasumit akuersissummik piniaqqaarsimassasoq. Tamanna pissaaq illumik imaluunniit sanaartukkamik piginnittunngortup nunaminertamut atugassiisuteqarnerup tiginissaanik qinnuteqarneratigut. Taamaalilluni kommunalbestyrelsi nunaminertamik atuinissamik pisinnaatitaaffiup piginnittunngortumut tunniunneqarnissaanut akuersissuteqartussaavoq. Piginnittunngortup pigisap maannamut atorneqarsimaneranit allaanerusumik atuinissani kissaatigippagu, atuinissarlu taanna sumiiffimmut pilersaarusionermut atuuttumut akerliuppat, kommunalbestyrelsip atugassarititaasussat nutaat taakku tunngavigalugit piginnaatitaaffimmik tunniussinissaq akueriumanngissinnaavaa.

Aamma nunaminertap piffissami sivikitsumi atorneqarnissaata akuerineqarsimanissaa pisariaqarpoq, assersuutigalugu utaqqiisaasumik containerinik assigisaannilluunniit inissiinerit. Utaqqiisaasumik atuinissaq qaammatinit marlunnit sivisunerusumik sivisussuseqarpat, aallaaviatigut kommunalbestyrelsi piffissamut aalajangersimasumut killiliilluni nunaminertamik atugassiilluni nalunaaruteqarsimassaaq.

Nunaminertamik atuneq qaammatinit marlunnit sivikinnerusumik sivisussuseqartoq, nalinginnaasumik nunaminertamik atuinissamik akuersissuteqarfigineqarsimanissaa piumasaqaataannngilaq. Taamaattorli tamatumunnga ataasiakkaatigut naliliineq apequtaassaaq. Aaqqissuussinerit nunaminertamik atorluaaffiungaatsiartussat, assersuutigalugu nunaannarmi aasaanerani naapeqatigiisitsinerit, atuinissaq assersuutigalugu sapaatip akunneranik ataasiinnarmik sivisussuseqaraluartoq, nunaminertamik atuinissamik akuersissuteqarfigineqarsimanissaa pisariaqarpoq. Nunaminertamik atugassiineq taamaattoq nalinginnaasumik nunaminertami saliinissamik piumasaqaatitalerlugu akuerineqassaaq.

Imm. 4-imut

Aalajangersakkami nunaminertamut pisinnaatitaaffik tassaasoq atuisinnaatitaaneq, taarsigassarsineri qularnaveeqqusiunneqarsinnaanngitsoq imaluunniit pisineri tunisinermilu akigineqarsinnaanngitsoq, suleriaatsimik atuutereersumik malittarisassanngortitsineruvoq naqissusiinerullunilu. Nunaminertami aalaakkaasumik nalilimmik sanasoqarsimappat, taanna aalaakkaasup nalinga pisineri tunisinermilu akigineqarsinnaavoq, taamaalilluni piginnittoq nunaminertamut atuisinnaanermut siullertut piginnaatitaaffeqalissalluni.

Aalajangersagaq oqaatsitigut imarisamigullu allannguuteqartinneqarluni nunaminertat atorneqartarnerat pilersaarusiortfigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi §§ 33-34-imik ingerlatitseqqiineruvoq. Nunaminertanik atuineq aamma pilersaarusiortneq pillugit Inatsisartut peqqussutaat nr. 6, 19. december 1986-imeersumi § 5-imut naleqqiullugu aalajangersakkap imarisaa pingaarnertut allannguuteqartinneqarpoq, taamaalilluni nunaannarmi nunaminertanut oqartusaaffik kommunalbestyrelsinut suliassanngortinneqarluni.

Imm. 1-imut

Aalajangersakkami oqartussat sorliit nunaminertamik atugassiisinaanersut aalajangersarneqarpoq. Sumiiffiit aqqissuussaasumik illuliorfigineqartussat kiisalu sumiiffiit tassunga pissusissamisoorumik atasuunersut kisimi pineqanngilaq, kisiannili aamma kommunip nunaannarmi nunaminertai pineqarlutik. Kommunalbestyrelsip nunaminertamik atugassiinissamut oqartussaasut sumiiffimmi aalajangiisinnaatitaaffia taamaalilluni sumiiffinnut kommunalbestyrelsip § 13 naapertorlugu pilersaarusiortfigisassaannut atuuppoq.

Imm. 2-imut

Aalajangersakkami aalajangersarneqarpoq sumiiffiit imm. 1-imi taaneqartut avataanni Naalakkersuisut oqartussaasuusut.

Imm. 3-imut

Sanaartukkanut nunamut tamarmut pingaaruteqartunut nunaminertanik qinnuteqartoqartillugu, Naalakkersuisut akuersissutaannik piniartoqaqqaarsimappat aatsaat nunaminertamik atuinissamut akuersissut kommunalbestyrelsimit nalunaarutigineqarsinnaavoq.

Assersuutigalugu inuussutissarsiornermut suliffeqarfiit anginerusut sumi inissinneqarnissaat pineqarpat, kommunalbestyrelsip nunaminertamik atuinissamik akuersissuteqartinnani qularnaassavaa, sanaartukkat annertunerusut aammalu pisortat suliffeqarfiisa inissisimaffissaannik nunaminertanik agguataarinissamut nuna tamakkerlugu pilersaarusiortnermi ataatsimut isigalugu malittarisassanut pingaarnernut tamanna naapertuunnersoq.

Tamatuma kingorna sumut inissiinissaq aalajangerneqareerpat kommunalbestyrelsip pineqartup, pilersaarummut atuuttumut naapertuuttumik sanaartugassap kommunimi inissinneqarnissaa aalajangissavaa.

Imm. 4-imut

Nunaminertamik atuinissaq aalajangersimasoq sanaartugassamut inatsisinnngorlugu imaluunniit nuna tamakkerlugu pilersaarusiortnermut malitassiannngorlugu Naalakkersuisunit imaluunniit Inatsisartunit politikikkikut aalajangigaasimappat, taava taanna nuna tamakkerlugu pilersaarusiortnermut immikkoortoq naapertorlugu

kommunimut pilersaarusiornermut killiliussanut ilaassaaq. Taamaalilluni nunaminertamik atugassiinissamut apeqqut pingaarnerusutigut naammassiinnagassaalissaaq, kommunimi nunaminertanut oqartussamut suliakkersuutaasariaqassanani.

Allatut nuna tamakkerlugu pilersaarusiornermut malitassiami, sanaartugassamut inatsimmi il.il. erseqqissumik allassimasoqanngippat, kommunimut pilersaarummi sumiiffiup ilaanut aalajangersimasumut pineqartumut aalajangersakkat malineqassapput.

§ 28-mut

Aalajangersagaq nunaminertat atorneqartarnerat pilersaarusiorfigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 35-imik ingerlatitseqqiineruvoq.

Nunaminertamik atugassiineq inummumut aalajangersimasumut tunniunneqartarpoq. Pineqartoq tassaasinnaavoq inatsisitigut pisussaatitaasoq pisinnaatitaasorlu, assersuutigalugu ingerlatseqatigiiffik, peqatigiiffik il.il.

§ 29-mut

Aalajangersagaq nunaminertanik atuineq aamma pilersaarusiorneq pillugit Inatsisartut peqqussutaat nr. 6, 19. december 1986-imeersumi § 6-imik ingerlatitseqqiineruvoq.

Aalajangersagaq nunaminertanik atugassiinermut pissutsit suut ilanngunneqarsinnaanersut pillugu maleruagassanik imaqarpoq.

Imm. 1-imut

Aalajangersakkami aalajangersarneqarpoq peqqussutissatut siunnersuutip siunertaanut naapertuuttumik nunaminertanik atugassiinermut piumasaqaatinik atugassarititaasussanillu aalajangersaasoqarsinnaasoq. Aalajangersakkap immikkoortuata aappaani aammattaaq aalajangersarneqarpoq piumasaqaatit atugassarititaasussallu § 13 naapertorlugu pilersaarusianut (tak. kap. 4) naapertuutissasut. Tamanna nunaminertanik atugassiinermut akuersissummi piumasaqaatini atugassarititaasussanilu aalajangersarneqartuni, pilersaarutit taakku aalajangersagartai sukumiinnginnerusut itisilerneqarsinnaanerannut akornutaanngilaq. Assersuutitut taaneqarsinnaavoq suliffeqarfiit sanaartugaannut ingerlatsinerannullu aamma matussappata matunerannut atatillugu piumasaqaatit, assersuutigalugu nunaminertap piffissap naleqquttup iluani atorneqalernissaanut taamatullu atuinissamut allamut mattussisumik inniminniinnarneqannginnissaanut qulakkeerinissaq eqqarsaatigalugu piumasaqarnissaq pisariaqartutut nalilerneqarpat. Suliffeqarfiup pilersinneqarnerani angallannermut sanaartukkat, eqqakkanut kuuffiit minguviaaviillu allilerneqarnissaat pisariaqalersinnaavoq.

Atugassarititaasussatut aalajangerneqarsinnaavoq suliffeqarfik pisortat tassunga atatillugu aningaasartuutissaannut akileeqaataassasoq.

Kisiannili piumasaqaatit atugassarititaasussatullu aalajangersarneqartussatut isumaliutersuutigineqartut nalinginnaasutut ilusilerneqarajuttarput aammalu innuttaasunut tamanut pingaaruteqarajuttarlutik, taamaalilluni innuttaasut piumasaqaatit atugassarititaasussallu atuutilersinneqartussatut isumaliutersuutigineqartut ilisimaarilernissaannut naleqquttuussusiinillu naliliisinaanissaannik periarfissinneqartussaassallutik. Taamaattoqartillugu piumasaqaatit atugassarititaasussallu pineqartut aatsaat peqqussutissatut siunnersuummi § 13 naapertorlugu sumiiffiup ilaanut aalajangersimasumut aalajangersagaliortoqareernerani aalajangersarneqarsinnaapput.

Imm. 2-imut

Aalajangersagaq nunaminertamik atuinissamik akuersissutip piffissamut aalajangersimasumut killilerneqarnissaanut tunngavissiivoq, taamaalilluni oqartussat aalajangiineranni pisunik unitsitsisoqaqqunagu, taamaalillutillu pingaartitassat allat ineriartornerup kingunerisaanik pingaernerutinneqarsinnaanerit pinngitsoortillugu.

Imm. 3-imut

Aalajangersakkami aalajangersarneqarpoq atuisinnaatitaanermut tunngaviusut tunngavissaajunnaarsimappata atuisinnaatitaaneq atorunnaarsinnaasoq; assersuutigalugu atuisinnaatitaaneq atorunnaarsinnaavoq illup atorneqarnera akuerisaq allanngorsimappat imaluunniit atorneqarunnaavissimappat.

§ 30-mut

Aalajangersagaq oqaatsitigut imarisamigullu allannguuteqartinneqarluni nunaminertat atorneqartarnerat pilersaarusiorfigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 47-imik ingerlatitseqqiineruvoq.

Imm. 1-imut

Aalajangersakkami kommunimut pilersaarutip saneqqunneqarnissaanut immikkut ittumik akuersissutit pineqarput aammalu sumiiffinnut pilersaarutit saneqqunneqarnissaannut immikkut ittumik akuersissuteqarsinnaaneq pillugu inatsimmi atuuttumi aalajangersakkanik ingerlatitseqqiinerulluni.

Kommunalbestyrelsi aalajangersagaq manna naapertorlugu, immikkut ittumik akuersineq pilersaarummi tunngaviusunut akerliunngippat, kommunimut pilersaarummi aalajangersakkat sanaqqunneqarnissaannut immikkut ittumik akuersissuteqarnissamut aalajangiisinnaatitaavoq. Tunngaviusut pingaartumik sumiiffiup ilaanut aalajangersimasumut siunertatut aalajangersakkami aammalu atuinissamut aalajangersakkani pilersaarummut siunertaasut aallaavigalugit

aalajangersarneqartuni aalajangersagaapput. Tunngaviusunut aamma sumiiffiup ilaata aalajangersimasup aaqqissugaanera ilaavoq, ilanngullugit nunaminertat atorneqartussaangitsut aammalu illuliortiterfissat agguataarneqarnerat. Taamaattumik sumiiffiup atorneqartussaangitsutut aalajangerneqarsimasup atorneqarnissaanut immikkut ittumik akuersissuteqartoqarsinnaangilaq.

Aalajangersakkat erseqqinnerusumik illuliortiterfissat annertussusaannik, ilusilersorneqarnissaannik inissisimaffissaannillu maleruagassiisut nalinginnaasumik pilersaarummi tunngaviusunut ilaaneq ajorput. Tamannali tamatigut atuuttangilaq: Sumiiffinni allanngutsaaliugassatut eriaqineqartuni, illuliornermi kusanartuliornissaq pilersaarutip siunertaanut ilaasimappat, sumiiffimmi illuliornermi kusanartunik isikkoqartitsinissap qularnaarnissaanut, aalajangersakkat illuliornermut maleruagassiisut pingaaruteqarluinnarsinnaapput. Taamaattumik taamaattoqartillugu immikkut ittumik akuersissuteqarnissamut periarfissat killeqartussapput.

Imm. 2-imut

Sumiiffiup ilaanut aalajangersimasumut aalajangersakkat maleruagassiisut isumaqatiginninniarnep kingorna imaluunniit Namminersornerullutik Oqartussat oqartussaasuunik isumaqatigiissuteqarnikkut aalajangersarneqarsimappata, pilersaarutip saneqqunneqarnissaa oqartussat pineqartut akuersereernerisigut aatsaat pisinnaavoq. Tamannattaq atuuppoq sumiiffimmut aalajangersakkat inatsisit atuuttut naapertorlugit aalajangersarneqarsimappata.

Sumiiffik assersuutigalugu Pinngortitamik illersuinissamik inatsimmi nunaannarmi illersuinissamik killeqarfinni, ilaatigut sinerissap killeqarfianit 100 meterinik ungasissusilimmi sanaartornissamik maleruagassiisumi, pineqartunut ilaasimappat, oqartussat taakku pineqartut akuersiteqqaarlugit aatsaat kommunalbestyrelsi immikkut ittumik akuersissuteqarsinnaavoq aammalu nunaminertamik atugassiinissamik/sanaartornissamut akuersissummik nalunaaruteqarsinnaalluni.

Imm. 3-imut

Aalajangersakkami aalajangersarneqarpoq immikkut ittumik akuerineqartussat qinnuteqaataasoq pilersaarummut tunngaviusussanut naapertuuppat aatsaat, kommunalbestyrelsi pilersaarutip tunngaviisa saneqqunneqarnissaannik immikkut ittumik akuersisinnaasoq. Qinnuteqaat pilersaarummut tunngaviusussanut akerliusimappat, kommunalbestyrelsip sumiiffimmut pilersaarutip tunngaviisa iluarsaateqqinneqarnissaat isumagisariaqarpaa imaluunniit § 21 naapertorlugu qinnuteqaat itigartittariaqarlugu.

Imm. 4-imut

Aalajangersakkami aalajangersarneqarpoq, immikkut ittumik akuersissuteqarneq eqqaamiunut pingaaruteqarsimappat, kommunalbestyrelsi saniliusunut kiisalu allanut attuumassuteqartunut suliap inerneranut annertuumik soqutigisaqarsinnaasutut naatsorsuutigineqartunut tusarniaassasoq. Akerliliissuteqarnissamut minnerpaamik sapaatit akunnerinik marlunnik piffissaliussisoqassaaq aammalu piffissaliussaq

taanna naareerpat aatsaat kommunalbestyrelsip suliaq inaarutaasumik suliarisinnaavaa.

§ 31-mut

Aalajangersagaq nunaminertat atorneqarnerat pilersaarusernerlu pillugit Inatsisartut peqqussutaata allangortinneqarnera pillugu Inatsisartut peqqussutaat nr. 17, 30. oktober 1992-imeersumi § 1-imik ingerlatitseqqiineruvoq.

Imm. 1-imut

Aalajangersagaq pinngitsaaliissummik taarsiinertalimmik arsaarinnissuteqartarnek pillugu inatsimmut tikuussisuuvoq, inatsit taanna pilersaarusernerup piviusunngortinneqarnissaanut pinngitsaaliissummik taarsiinertalimmik arsaarinnissuteqartarnek pillugu inatsisitigut tunngavissanik pisariaqartunik imaqarluni. Pisut ilaanni pilersaarutit piviusunngortinneqarnissaanut pisinnaatitaaffinnut pioreersunut akuliunnissaq pisariaqarsinnaavoq. Tamanut saqqummiussinissamut maleruagassatigut pilersaarutissatullu siunnersuutit pillugit oqallitsitsinertigut soqutigisat aalajangersimasat imminnut aporaattut taarsiinissamullu kissaatigineqartut siusissukkut saqqummertarnissaat anguniarneqartarpoq, taamaalillutillu pilersaarutit inaarutaasumik ilusilerneqannginneranni ilanngunneqarsinnaanissaat periarfissiniarneqartarluni.

Pinngitsaaliissummik taarsiinertalimmik arsaarinnissuteqartarnek pillugu aalajangersakkap atorneqarsinnaanissaanut pingaaruteqarpoq, sumiiffiup ilaanut aalajangersimasumut aalajangersakkani atuinerup/illuliortiternerup pinngitsaaliissummik taarsiinertalimmik arsaarinnissuteqarfigineqartartussat kissaatigineqartup erseqqissumik nassuiarneqarsimanissaa. Taanna pillugu kommunimut pilersaarut ima sukumiitigisariaqarpoq, nunaminertap pineqartup sumut atorneqarnissaa eqqarsaatigineqarnersoq erseqqissumik allassimasariaqarluni, ilanngullugu illuliortifissanik atuinissaq kiisalu allatut nunaminertanik atuinissaq.

Piumasaqaataannngilaq pilersaarummik piviusunngortitsisut tassaassasut pisortat oqartussat. Pigisaq pinngitsaaliissummik taarsiinertalimmik arsaarinnissutigineqartoq inummut allamut pilersaarummut tunngaviusut imarisai naapertorlugit atuiumasumut taamaalilluni tunniunneqarsinnaavoq.

Imm. 2-imut

Pinngitsaaliissummik taarsiinertalimmik arsaarinnissuteqartarnek pillugu aalajangersakkat, pigisanik aalaakkaasunik arsaarinnissuteqartarnek pillugu Kalaallit Nunaannut inatsit naapertorlugu, suliassaqarfinnut Namminersornerullutik Oqartussat akisussaaffigisaannut killiligaavoq. Suliassaqarfinnut Namminersornerullutik Oqartussat akisussaaffiginngisaanni Naalagaaffimmit pinngitsaaliissummik taarsiinertalimmik arsaarinnissuteqartarnek, pigisanik aalaakkaasunik arsaarinnissuteqartarnek pillugu inatsit sukkulluunniit atuuttoq naapertorlugu pisinnaavoq.

§ 32-mut

Aalajangersagaq nunaminertat atorneqartarnerat pilersaarusiordfigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 31-imik ingerlatitseqqiineruvoq.

Imm. 1-imut

Aalajangersakkami pigisamut piginnittup pisut ilaanni kommunip pigisamik pineqartumik tamakkiisumik ilaannaasumilluunniit taarsiissuteqarluni tigusinissaanik piumasaqarsinnaatitaanera aalajangersarneqarpoq. Pigisamik aningaasatigut atorluanaanissamik periarfissaq aalajangersakkanit kommunimut pilersaarummi aalajangersarneqartunit atuukkunnaarsinneqarpat imaluunniit ajorseriartinneqarpat, aalajangersagaq atorneqarsinnaavoq. Tamanna pisinnaavoq kommunalbestyrelsip illumik isaterinerit imaluunniit allannortiterinerit kommunalbestyrelsimit akuerineqaqqaartassasut piumasarippagu. Illuutit ataasiakkaat imaluunniit illoqarfup ilaasa ataasiakkaat piunnartinneqarnissaannut atatillugu killilersuineri tamanna ilaatigut atuutissaaq.

Imm. 2-imut

Tiguisussaataaneq imm. 2-imi maleruagassami killilerneqarpoq. Aalajangersagaq manna naapertorlugu naliliinissamut, piffissami tigusinissamik piumasaqarnerup saqqummiunneqarnerani pissutsit aallaavigalugit, pissutsit pilersaarut pigineqanngitsuuppat qanorissimassagaluarnerannik assersuussineq tunngaviussaaq.

Imm. 3-imut

Aalajangersakkami aalajangersarneqarpoq aaqqiinissamik isumaqatigiittoqanngippat taarsiissutip annertussusaa pinngitsaaliissummik taarsiinertalimmik arsaarinnissuteqartarneq pillugu inatsit tunngavigalugu aalajangerneqassasoq.

§ 33-mut

Aalajangersagaq oqaatsitigut allannguuteqartinneqarluni nunamik atuineq pilersaarusiorderlu pillugit Inatsisartut peqqussutaata nr. 6-ip 19. december 1986-imeersup allannortinneqarnera pillugu Inatsisartut peqqussutaat nr. 1 ulloq 18. juni 1987-imeersumi § 21-imik ingerlatitseqqiineruvoq.

Aalajangersagaq piginnaatitsissutaavoq aammalu aalajangersarneqarpoq Namminersornerullutik Oqartussat illuliormermik oqartussaaneq pillugu aamma illuliassat sanaartugassallu allat napparnissaat, sananeqarnissaat aamma aqqiissuunnissaat pillugit aalajangersakkanik aalajangersaassasut.

Piginnaatitsissut illuliortiternermi oqartussaassuseq pillugu Namminersornerullutik Oqartussat nalunaarutaanni nr. 13-imi 18. august 2006-imeersumi atuuttumi atorneqarpoq.

§ 34-mut

Aalajangersagaq oqaatsitigut allannguuteqartinneqarluni nunamik atuineq pilersaarusiernerlu pillugit Inatsisartut peqqussutaata nr. 6-ip 19. december 1986-imeersup allanngortinneqarnera pilluq [Inatsisartut peqqussutaat nr. 1 ulloq 18. juni 1987-imeersumi § 22-imi ingerlatitseqqiineruvoq.](#)

Aalajangersakkami kommunalbestyrelsi maleruagassat Naalackersuisunut isumaqatigiissutigineqartut naapertorlugit oqartussatut suliarinninnermut akitsuummik akiliisitsisarnissaanik piginnaatinneqarpoq. Tunngaviusut immikkut ittut atuutsillugit akitsuutit aalajangersimasumik siunertallit pineqarput. Taamaalilluni naatsorsuineri aningaasartuutit toqqaannartumik, toqqaannangitsumik imaluunniit illuatungeriisillugit sumiiffimmut tunngassuteqartut kisimik ilanngunneqarsinnaapput.

Akitsuummi ilaapput aningaasartuutit kommunip suliarinninnermini aningaasartuutigisai kiisalu aningaasartuutit naleqquttumik naliliineq malillugu qinnuteqaatinik aqutsinermut tunngasut, ilanngullugit misissuineri, assersuutigalugu atuinissamik akuersissummik tunniussinnginnermi illuliorfimmik takusaanermi.

§ 35-mut

Aalajangersakkami imm. 1 nunamik atuineq pilersaarusiernerlu pillugit Inatsisartut peqqussutaata nr. 6-ip 19. december 1986-imeersup allanngortinneqarnera pillugu Inatsisartut peqqussutaat nr. 1 ulloq 18. juni 1987-imeersumi § 23-imi ingerlatitseqqiineruvoq. Aalajangersakkami imm. 2 nutaajuvoq aammalu innuttaasut inatsisitigut illersugaanissaasa qularnaarneqarnissaa siunertaralugu.

Imm. 1-imut

Illuliassat sanaartugassallu allat napparnissaanni, sananeqarnissaanni aamma aaqqissuunnissaanni maleruagassat peqqussummi matumani tunngavissinneqartut malinneqarnissaat qulakkeerniarlugu, illuliornermut oqartussat isumaqatigiissuteqareernerimikkut aammalu eqqartuussinertaqanngitsumik illumut inuup nammineq pigisaanut isernissaminik piumasaqarsinnaapput.

Tunngaviusumik inatsimmi § 72 pingaarnertut maleruagassaavoq, taanna malillugu inigisaq innimigineqartussaalluni. Aalajangersakkammi eqqartuussinertaqanngitsumik akuliunnissaq pineqartoq naammassiniarlugu

immikkut ittumik pisariaqarpat, inatsisit pingaarnertut maleruagassamik pinngitsoortitsisinnaapput.

§ 35-imut pingaarnertut siunertaavoq, illuliortiternerup maleruagassanut aalajangersagaasunut naapertuuttumik ingerlanneqarnissaata aaqqissuunneqarnissaatalu qularnaarneqarnissaa, tak. § 33. Taamaattumik nakkutilliisussaataasut illuummut isersinnaanissaat pisariaqarpoq. Siunertaasoq inigisap innimigineqartussaananeramik pingaartitsinermit pingaaruteqarnerusoq naatsorsuutigineqarpoq.

Imm. 2-imut

Aalajangersakkami imm.1 inigisap innimigineqartussaanera pillugu tunngaviusumik inatsimmi § 72-imi ilaatitsinnginnermik imaqarpoq. Innuttaasut inatsisitigut illersugaanissaat qularnaarniarlugu aammalu aalajangersakkap pissusissamisunnigsumik atornerlunneqarsinnaanera pinngitsoortinniarlugu, pigisamut namminerisamik pigineqartumut isernissaq piumasarineqartillugu, kommunalbestyrelsip imaluunniit kommunimi pilersarusiornermut oqartussaasup tamanna piumasarineqartillugu kinaassutsimik ilisarnaammik takutitsisussaanera piumasagaataavoq.

§ 36-mut

Aalajangersagaq nutaajuvoq aammalu nunaminertat atornerarnerat pilersarusiornerlu pillugit Inatsisartut peqqussutaat nr. 6, 19. december 1986-imeersumi § 21-imut taartaalluni, taanna malillugu kommunalbestyrelsip aalajangiineri Naalakkersuisunut suliassanngortinneqarsinnaassallutik.

Imm. 1-imut

Aalajangersakkami pilersaarutinut aamma nunaminertanut naammagittaalliuuteqartarfiup pilersinneqarnissaa tunngavissinneqarpoq.

Imm. 2-imut

Aalajangersakkami inatsisitigut maannakkut inissisimaneq erseqqissarneqarpoq, erseqqissarneqarluni pissutsit inatsisinik tunngaveqartut pillugit aalajangiinerit kisimik naammagittaalliuutigineqarsinnaasut. Pilersaarutinut aamma nunaminertanut naammagittaalliuuteqartarfik kommunalbestyrelsip aalajangiinerinik naammagittaalliuutinik suliarinnittartussaap pilersinneqassaaq. Tamannali pinngitsaaliissummik taarsiinertalimmik arsaarinnissuteqartarneq pillugu aalajangiinernut atuutinngilaq, taakkua Naalakkersuisut pinngitsaaliissummik taarsiinertalimmik arsaarinnissuteqarnermut ataatsimiititaliaannit aalajangiiffigineqartarmata.

Assersuutigalugu pissutsit inatsisinik tunngaveqartut makkua naammagittaalliuutigineqarsinnaapput:

- Pilersaarutininut inatsit aamma kommunimut pilersaarut eqqortumik nassuiarneqarsimanersut pillugit apeqqutit, tassunga ilanngullugu immikkut ittumik akuersissut pilersaarutip tunngaviinut akerliunersoq.
- Illuliorneq imaluunniit sanaartorneq sumiiffiup ilaanut aalajangersimasumut pineqartumut sukumiisumik aalajangersagaliornissamut pisussaaffeqartitsilernersoq pillugu apeqqutit.
- Kommunip peqqusissutaasa inerteqqutaasalu qanoq nassuiartariaqarnerannik apeqqutit.
- Kommunimut pilersaarut pilersaarusionermut inatsimmi piumasarineqartutut imaqarneris pillugu apeqqutit.
- Kommunimut pilersaarusionermut, kommunimut pilersaarummut tapiliussaliornermut, immikkut ittumik akuersissuteqarnermut imaluunniit nunaminertamik atugassiinerimut atatillugu suleriaatsit aalajangiisinnaatitaanerlu pillugit maleruagassat malinneqarnerisut pillugu apeqqutit.

Maalaarummik suliaqarnerimut atatillugu pilersaarutininut aamma nunaminertanut naammagittaalliuuteqartarfiup nalilertarpa, inatsisini ingerlatsinerimut tunngasuni suliamut peqataasinnaatitaaneq, attuumassuteqartunik tusarniaaneq, naligiisitsinissaq il. il. pillugit maleruagassat malinneqarsimanersut.

Pilersaarusionermut inatsit malinneqarsimappat pilersaarutininut aamma nunaminertanut naammagittaalliuuteqartarfiup kommunip aalajangigaa naapertuuttuunersoq tulluurtuunersorluunniit isummerfigisinnaangilaa.

Naammagittaalliuuteqarneq tulluarnersoq pillugu apeqqummut pilersaarutininut aamma nunaminertanut naammagittaalliuuteqartarfik aalajangiisussaaq. Taamaattumik kommunalbestyrelsip naammagittaalliuutit tigusani tamaasa pilersaarutininut aamma nunaminertanut naammagittaalliuuteqartarfimmu ingerlateqqissallugit pisussaaffeqarpoq. Tassunga atatillugu naammagittaalliuuteqarneq tulluarnersoq pillugu apeqqummut naliliinini pillugu kommunalbestyrelsi oqaaseqaateqarsinnaavoq.

Kommunimut pilersaarutit Naalakkersuisunit akuerineqartussaasut aammalu peqatigisaanik Naalakkersuisut pissutsinut peqqussummi pineqartunut kommunalbestyrelsip aalajangiinerinut naammagittaalliuuteqarfigineqartussaasut pillugu aqqissuussinerup maannakkut atuuttup akerlianik aqqissuussineq taanna pilersaarutissatut siunnersuutikkut allanngortinneqarpoq.

Siunissami kommunimut pilersaarutissatut siunnersuusionermi oqartussat pilersaarutissatut siunnersuummik akuersisussat aammalu suliaasaqarfimmi naammagittaalliuuteqarfissat assigiinngitsuussapput. Tassunga atatillugu aamma oqaatigineqassaaq innuttaasut inatsisitigut isumannaatsumik inissisimanerat pitsaangorsarneqarmat, siunissami nunaannarmi nunaminertamik atugassiinissamik kommunip aalajangiineri naammagittaalliuutigineqarsinnaalernerat pissutaalluni. Naalakkersuisut peqqussut atuuttoq naapertorlugu nunaannarmi nunaminertanut oqartussaasuummata, maannamut tamatumunnga aalajangiinerit ingerlatsinerim oqartussanut allanut naammagittaalliuutigineqarsinnaanissaat ajornarsimavoq.

Imm. 3-imut

Pilersaarutitut aamma nunaminertanut naammagittaalliuuteqartarfimmut suliakkiissuteqarnissamut piffissarititaasoq kommunalbestyrelsip aalajangiinerminik nalunaaruteqareernerata kingorna sapaatit akunnerinik 8-inik killilerneqarpoq.

Kommunimi aalajangiinerit pillugit naammagittaalliuuteqarnissamut piffissarititaasoq aalajangiunneqarpoq, sanatitsisup nunaminertamut atugassiissummut atuuttumut naapertuuttumik sanaartugassatut pilersaarumminik piviusunngortitsisinnaanissaanik qularnaariffigineqarsinnaanissaa siunertaralugu. Sanatitsisup imaluunniit pigisamik piginnittup taamaalilluni piffissap aalajangersimasup qaangiunnerani nalujunnaassavaa sanaartugassani piviusunngortinneqarsinnaassanersoq.

Imm. 4-imut

Aalajangersakkami aalajangersarneqarpoq, kommunip aalajangiinera taanna naammagittaalliuutigineqarsimappat, inuk akuersissummik tunineqartoq, ilanngullugu kommunimi pilersaarusiornermut oqartussamit immikkut ittumik akuersissut, ilisimatinneqassasoq. Assersuutigalugu saniliusup pigisap nunaminertaata illuliorfigineqarnerata allilerneqarnissaanut nunaminertamik atugassiissuteqarneq naammagittaalliuutigippagu, piginnaatitaaffimmik pigisaqartoq saniliusup naammagittaalliuuteqarneranik ilisimatinneqassaaq. Kommunip aalajangiinera naammagittaalliuutigineqaraluartoq akuersissummik tigusaqartoq suliap inerneranik annertuumik immikkullu ittumik soqutiginnissasoq naatsorsuutigisariaqarpoq.

Imm. 5-imut

Aalajangersakkami erseqqissarneqarpoq pilersaarutitut aamma nunaminertanut naammagittaalliuuteqartarfiup aalajangiineri aqutsinermi oqartussanut allanut ingerlateqqinneqarsinnaanngitsoq. Pilersaarutitut aamma nunaminertanut naammagittaalliuuteqartarfik eqqartuussisuunngimmat naammagittaalliuuteqartarfiup aalajangiineri tunngaviusumik inatsimmi § 63 naapertorlugu tamatigut eqqartuussisunut ingerlateqqinneqarsinnaassapput.

§ 37-mut

Aalajangersagaq nutaajuvoq. Namminersornerullutik Oqartussat nalunaarutaat nr. 23, 18. december 1992-imeersumi § 48, imm. 3 naapertorlugu Naalakkersuisut naammagittaalliuutinut oqartussaasutut kommunalbestyrelsip akuersissuteqarluni nalunaarutaanik kinguartitsinissamik sunniuteqartitsinissamik periarfissaqarsimapput.

Aalajangersakkami tunngavissinneqarpoq kommunalbestyrelsip aalajangiineranut naammagittaalliuutaasoq, tak. § 36, kinguartitsinermik sunniuteqartinneqarsinnaasoq, illuliorneq imaluunniit sanaartorneq, ilanngullugu

isaterineq, naammagittaalliuuteqarnerup aalajangiiffigineqarnissaata tungaanut unitsikkallarnejassalluni.

Naammagittaalliuuteqarneq kinguartitsinermik sunniuteqartinneqassanersoq pillugu aalajangiineq immikkut ittumik naliliiffigisassaavoq, naammagittaalliuuteqartarfiup suliani ataasiakkaani pisut aallaavigalugit isummerfigisassaralugu.

Naammagittaalliuuteqarneq kinguartitsinermik sunniuteqartinneqarsinnaanersoq sunniuteqartinneqartariaqarnersorlu, inatsisinik annertuumik unioqqutitsisoqarsimanagera ilimanaateqarsinnaanersoq aallaavigalugu naliliiffigineqassaaq. Aammattaaq akuersissutip atorineqaannarneratigut kingusinnerusukkut pissutsit inatsisinut naapertuuttunngorlugit iluarsiinissaq ajornakusuulissasoq imaluunniit ajornarsivissasoq ilimanaateqarnerasoq naliliiffigineqassaaq.

Akuersissutininik oqariaatsimi pineqarput akuersissutit, akuersinerit, ilanngullugit immikkut ittumik akuersissutit aamma peqqusinerit. Pilersaarutissatut siunnersuutit pillugit naammagittaalliuutit akerlianik kinguartitsinermik sunniuteqartinneqarsinnaanngillat.

§ 38-mut

Aalajangersagaq nutaajuvoq aammalu pilersaarutininut aamma nunaminertanut naammagittaalliuuteqartarfimmuut maleruagassanik erseqqinnerusunik aalajangersaanissaq tunngavissillugu. Aalajangersakkakut pilersaarutininut aamma nunaminertanut naammagittaalliuuteqartarfiup katitigaanera, allattoqarfeqarnermi sullinneqanera akissarsiaqartinneqarneralu il. il. pillugit erseqqinnerusunik aalajangersaanissaq periarfissinneqarpoq.

§ 39-mut

Aalajangersakkami imm. 1 nunaminertanik atuineq aamma pilersaarusiorneq pillugit Inatsisartut peqqussutaat nr. 6, 19. december 1986-imeersumi § 22-imik ingerlatitseqqiineruvoq. Aalajangersakkami imm. 2 nutaajuvoq aammalu innuttaasut inatsisitigut illersugaanissaasa qularnaarneqarnissaa siunertaralugu, aalajangersakkami imm. 1-imi inigisap innimigineqartussaanera pillugu tunngaviusumik inatsimmi aalajangersakkamik annikillisisitsisoqarluni. Aalajangersakkap siusinnerusukkut oqaasertalerneqarnerani peqqussummi § 5 innersuussutigineqarpoq, taamaaliornikkut ilaatigut suliffeqarfiit ingerlatsisinnaatitaasut taakkunungalu assingusut sanaartorfissanik pilersaarusiornissap qularnaarneqarnissaa siunertaralugu tunngaviusumik inatsimmi § 72-imi pineqartunut ilaatinneqanngitsoorsinnaasimallutik.

Tamanna annertuumik ilaatitsinngitsoornissamik kinguneqartussanngorsimavoq, tamannalu siunertarineqarnani. Taamaattumik aalajangersakkap oqaasertalerneqanera sukateriffigineqarpoq. Tamatuma kingorna taamaallaat

Naalackersuisut pilersaarusionermut oqartussaasui aammalu kommunip pineqartup pilersaarusionermut oqartussaasui eqqartuussivimmit akuersissuteqartitseqqaaratik pigisamut inummik pigineqartumut isernissamik piumasaqarsinnaalerput.

Imm. 1-imut

Aalajangersakkami Naalackersuisut pilersaarusionermut oqartussaasuinut aamma kommunip pilersaarusionermut oqartussaasuinut pigisamut inummik pigineqartumut tummarsinnaatitaaffiliisoqarpoq, ilaatigut nuna tamakkerlugu aamma kommunimut pilersaarusionermut piareersaanermut atatillugu.

Tunngaviusumik inatsimmi § 72 pingaarnertut maleruagassaavoq, taanna malillugu inigisaq innimigineqartussaalluni. Aalajangersakkammi eqqartuussinertaqanngitsumik akuliunnissaq pineqartoq naammassiniarlugu immikkut ittumik pisariaqarpat, inatsisit pingaarnertut maleruagassamik pinngitsoortitsisinnaavoq.

Aalajangersakkami pigisamut nakkutilliiniarluni isersinnaanissaq pineqarpoq, tassani qulakkeerniarlugu illuliortiterneq aammalu nunaminertamik atuineq tamatumunnga maleruagassatut aalajangersakkanut naapertuuttumik ingerlanneqarnersut aaqqissuunneqarnersullu, ilaatigullu pilersaarusionermut teknikkikkut piareersaanermut atatillugu isersinnaaniarluni.

Taamaattumik pilersaarusionermut oqartussat pigisamut isersinnaanissaat pisariaqarpoq. Siunertaasoq inigisap innimigineqartussaananeramik pingaartitsinermut pingaaruteqarnerusoq naatsorsuutigineqarpoq.

Imm. 2-imut

Aalajangersakkami imm. 1 inigisap innimigineqartussaananera pillugu tunngaviusumik inatsimmi § 72-imi ilaatitsinnginnermik imaqarpoq. Innuttaasut inatsisitigut illersugaanissaat qularnaarniarlugu aammalu aalajangersakkap pissusissamisuumngitsumik atornerlunneqarsinnaanera pinngitsoortinniarlugu, pigisamut namminerisamik pigineqartumut isernissaq piumasarineqartillugu, Naalackersuisut pilersaarusionermut oqartussaasuata imaluunniit kommunimi pilersaarusionermut oqartussaasup tamanna piumasarineqartillugu kinaassutsimik ilisarnaammik takutitsisussaanera piumasaqaataavoq.

§ 40-mut

Imarisamigut allannguuteqartinneqarluni aalajangersagaq nunaminertat atornerqartarnerat pilersaarusifigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 45, imm. 1-imik aamma 2-imik ingerlatitseqqiineruvoq. Nunaannarmi nunaminertanut oqartussaananerup tunniunneqarnerata malitsigisaanik, tak. peqqussummi § 27, kommunalbestyrelsip nakkutilliisussaatitaanera kommuneqarfimmut tamarmut annertusineqarpoq.

Imm. 1-imut

Kommunalbestyrelsi peqqussummi matumani maleruagassat imaluunniit aalajangersakkat peqqussummi tunngaveqarluni aalajangersarneqartut malinneqarnersut nakkutigissallugu pisussaaffeqarpoq. Kommunalbestyrelsip inatsisinik unioqqutitsineq paasigunikku taamaalilluni pissutsit inatsisinut naapertuuttunngortinniarnissaat pisussaaffigaa.

Nakkutilliisussaataaneq kommunalbestyrelsip suliniuteqarnissaanik imaqarpoq. Taamaalilluni naleqquttumik akuttussusilimmik kommunimi sumiiffiit ilai aalajangersimasut misissorneqartassapput takuniarlugu maleruagassat atuuttut malinneqarnersut. Pilersaarusiornermut/nunaminertanut oqartussat nakkutilliinermi pissutsinik inatsisinik unioqqutitsisunik paasisaqarunik, nalilissavaat atuneq pineqartoq qanoq sivisutigisumik ingerlasimanersoq, ilanngullugu kommunalbestyrelsi iliuuseqarani pissutsinut inatsisinik unioqqutitsisunut isiginnaartuunnarsimanersoq. Aalajangiineq pisinnaatitaaffimmik pigisaqartumut akerliusoq, peqqussummi § 36 naapertorlugu naammagittaalliuutitut suliakkiissutigineqarsinnaassaaq.

Nakkutilliisussaataanermi aamma ilaapput aalajangersakkat kommunimut aamma sumiiffinnut pilersaarutini aalajangersarneqartut, peqqussummi § 44, imm. 3 malillugu atuutsiinnarneqartut.

Imm. 2-imut

Nakkutilliinermi pineqarput inerteqqutinik peqqusissutinillu peqqussut naapertorlugu aalajangiunneqarsimasunik eqquutsitsineq, ilanngullugit naammagittaalliuutinik suliaqarnermut imaluunniit aalajangiinernut, tak. §§ 36 aamma 37, atatillugu aalajangiinerit naammagittaalliuutinut oqartussanit imaluunniit eqqartuussinikkut aalajangiunneqarsimasut. Aammattaaq nakkutilliinermi pineqarput atugassarititaasussatut akuersissuteqarnernut immikkullu ittumik akuersissuteqarnernut atatillugu aalajangersagaasimasinnaasut, ilanngullugit nunaminertanik atugassiinerit aamma sanaartornissamut akuersissutit.

§ 41-mut

Aalajangersakkami imm. 1 oqaaseqatigiit siulliit nutaajupput. Nunaminertat atorineqartarnerat pilersaarusiorfigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 46, imm. 1 oqaaseqatigiit siulliit naapertorlugit Naalakkersuisut nalunaarummi § 48 malillugu naammagittaalliuuteqarnermut atatillugu kommunalbestyrelsimut pissutsinik inatsisinik unioqqutitsisunik inatsisinut naapertuuttunngortitsinissamik peqqusissuteqarsinnaasimapput. Naalakkersuisut siunissami naammagittaalliuutinut oqartussaajunnaartussaammata aammalu Naalakkersuisut naammagittaalliorqartillugu pissutsinik ilisimaarinnilernissaannik piumasaqaat annertuumik killiliisartoq paasineqarmat, aalajangersakkap oqaasertaa

allanngortinneqarpoq, taamaalilluni Naalakkersuisut pissutsinut pineqartunut ilisimaarinnilersimanissaat siunissami piumasaqaataajunnaarluni.

Aalajangersakkami imm. 1 oqaaseqatigiit aappaat kiisalu imm. 2 oqaatsitigut allannguuteqartinneqarlutik nunaminertat atorineqartarnerat pilersaarusiortifigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 46, imm. 1 oqaaseqatigiit aappaannik aamma imm. 2-imik ingerlatitseqqiinerupput.

Imm. 1-imut

Naalakkersuisut pissutsinik unioqqutitsisunik paasisaqarunik, kommunalbestyrelsi nakkutilliisussaataitanerminnik isumaginnilluni pissutsinik taakkunannga inatsisinut naapertuuttunngortitsiniarnissaanik Naalakkersuisut nammineerlutik peqqusinnaavaat. Naalakkersuisut aamma tassunga atatillugu aalajangersinnaavaat inatsisinut naapertuuttunngortitsinissaq qanoq ittoq kommunalbestyrelsip naammassiniassagaa.

Tassunga uiggiullugu Naalakkersuisut aamma kommunalbestyrelsi peqqusinnaavaat peqqussut manna naapertorlugu pinngitsoortinneqarsimasut inatsisinut naapertuuttunngorteqqullugit, assersuutigalugu § 14 naapertorlugu kommunimut pilersaarusiortnermi periaasissamik tamanut saqqummiussinngitsoorsimaneq.

Imm. 2-imut

Aalajangersakkami Naalakkersuisut nunaminertamik unioqqutitsisunik atugassiisimaneq imaluunniit nunaminertamik atuineq pillugu suliami illuliorneq imaluunniit nunaminertamik atuineq nammineerlutik inatsisinut naapertuuttunngortinniarlugu aalajangersinnaanerat ammaanneqarpoq. Tamatumunnga tunngaviussaaq illuliorneq imaluunniit nunaminertamik atuineq naammassereersimassasoq kiisalu pilersaarusiortnermi pingaartinneqartussanut naapertuutissasoq, ilanngullugu pilersaarusiortnermi innuttaasut peqataatinneqarnissaannik pingaartitsineq.

§ 42-mut

Aalajangersagaq oqaatsitigut allannguuteqartinneqarluni nunaminertat atorineqartarnerat pilersaarusiortifigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersumi § 51-imik ingerlatitseqqiineruvoq.

Imm. 1-imut

Aalajangersakkami peqqusissuteqarluni imaluunniit pissutsinik inatsisinik unioqqutitsisunik iluarsiiviginninnissamik nalunaaruteqarnerup malinneqarnissaa pineqarpoq. Aalajangersakkamik unioqqutitsineq pingaartumik tassaassaaq akuersissummik peqarani illulioortiterneq, ilanngullugu inerteqquteqarallarmik

unioqqutitsineq aammalu atugassarititaasunik ataasiakkaanik assigiinngitsunik, akuersissuteqarnermut atatillugu piumasarineqarsimasunik unioqqutitsinerit.

Imm. 2-imut

Pineqaatissiissutit tassaapput akiligassiinerit. Aammattaaq ingerlaannartunik akiligassiinerit, pinngitsaaliissutitut akiliisitsissutit atorlugit pinngitsaaliissuteqarnikkut pissutsit unioqqutitsisut iluarsineqarnissaannik piumasaqartoqarsinnaavoq. Kingulliullugu taaneqartoq, pissutsit atuuttut inatsisinik unioqqutitsisutut oqaatigineqaraluartut attatiinnarnissaat aningaasatigut annertuumik soqutiginaateqartutut isigineqarsinnaasimappata, pinngitsaaliissuteqarnissamut sakkussatut pisariaqartutut isigineqassaaq. Akiligassiinerit ullormoortuusinnaapput, sapaatit akunnikkaarsinnaallutik imaluunniit qaammatikkaartuullutik. Pineqaatissiissummut/akiligassiinerimut inatsisitigut tunngavissaq tassaavoq eqqartuussissut.

Imm. 3-imut

Eqqartuussissut malinneqanngippat, pilersarusiornermut oqartussaq imminut ikiornissamut iliuuseqarluni piginnittup akiligaanik pissutsit iluarsisinnaavai.

Pilersarusiornermut oqartussap pissutsinik piginnittup akiligaanik iluarsisinnaanissaanut tunngavissat tulliuuttuni taaneqartut tamarmik eqquutsinneqarsimassapput:

1. Pissutsit inatsisinik unioqqutitsisut iluarsinissaannut peqqusissut eqqartuussinikkut nalunaarutigineqartoq eqqartuussissummi piffissarititassatut aalajangiunneqartup iluani malinneqarsimanngippat aamma
2. Pinngitsaaliissutitut akiliisitsissutinik akiliisitsiniarnerit pissutsit iluarsineqarnerinik kinguneqarsimanngitsutut isigineqarpata.

Aammattaaq naleqqatigiisitsinissamik tunngaviusoq malillugu akuliunneq taamaaliornikkut angusassamut naleqqiullugu naapertuuttuusussaavoq. Naleqqatigiisitsinissamik tunngaviusoq taanna imminut ikiorniarluni iliuuseqarnermi suliasap suliarineqarneranut taamatullu aningaasatigut kingunerisassaannut atuuppoq.

§ 43-mut

Aalajangersagaq nutaajuvoq. Aalajangersagaq nunaminertat atorneqarnerat pilersarusiornerlu pillugit Inatsisartut peqqussutaat nr. 6, 19. december 1986-imeersumi § 24-imut taartaavoq. Suliassaqarfimmut siusinnerusukkat aalajangersagaasumut naleqqiullugu pineqaatissiisarnermut aalajangersakkanik, peqqussut malillugu maleruagassanik aalajangersarneqartuni aalajangersaanissamut inatsisitigut tunngavissaq erseqqissarneqarpoq.

Imm. 1-imut

Aalajangersakkami akileeqqusissuteqarnissamik imaluunniit Inatsisartut peqqussutaanni aalajangersakkat unioqqutinneqarneranni pineqaatissiissuteqarnissamik periarfissaqarneq pineqarpoq.

Aalajangersakkami maleruagassat taaneqartut unioqqutinneqarnerisa kingunerisaannik akiligassiisutit annertussusilerneqarneranni, pineqartup aalajangersakkamik unioqqutitsinermini aningaasatigut iluaqutissarsisimanera, iluaqutissarsiniarnissamik siunertaqarsimanera imaluunniit pineqartup unioqqutitsinermigut soqutigisaminik aallussiniarsimanera immikkut pingaartinneqartariaqarpoq.

Imm. 2-imut

Aalajangersakkami aalajangersarneqarpoq unioqqutitsisoq suliffeqarfiusimappat, tamakkiisumik ilaannaasumilluunniit Naalagaaffimmit, Namminersornerullutik Oqartussanit, kommunimit imaluunniit kommunit ataatsimoorfiinit, aktiaatileqatigiiffimmit, pigisaqaqatigiiffimmit, piginneqatigiiffimmit, assigisaannilluunniit pigineqartoq, suliffeqarfik il.il. taamatut akisussaatinneqarsinnaavoq.

Inatsisitigut pisinnaatitaasut pisussaataasullu pineqaatissinneqarsinnaasunut ilaalersinneqarnissaat siunertaralugu aalajangersagaq siusinnerusukkut pineqaatissiinnissamut aalajangersakkamut naleqqiullugu allannguuteqartinneqarpoq.

§ 44-mut

Aalajangersagaq nutaajuvoq aammalu peqqussutip ulloq atuutilerfissaanik aalajangersaaviulluni, ilanngullugu nunaannarmi nunaminertanut pilersaarusiormut nunaminertanullu aalajangiisinnaatitaanerup tunniunneqarnissaa.

Imm. 1-imut

Peqqussut 1. januar 2009 atuutilissasoq naatsorsuutigineqarpoq.

Imm. 2-imut

Aalajangersakkakkut nunaminertat atorneqarnerat pilersaarusiormerlu pillugit Inatsisartut peqqussutaat nr. 6, 19. december 1986-imeersoq, nuna tamakkerlugu pilersaarusiormerut udvalgip suleriaasissaa pillugu Namminersornerullutik Oqartussat nalunaarutaat nr. 5, 21. april 1981-imeersoq kiisalu nunaminertat atorneqartarnerat pilersaarusiormerfigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersoq atorunnaarsinneqarput.

Imm. 3-imut

Aalajangersakkami aalajangersarneqarpoq nunaannarmi pilersaarusiornissamut nunaminertanullu aalajangiisinnaatitaaffik kommuninut 1. januar 2011 tunniunneqassasoq. Tamatumunnga pissutaavoq Namminersornerullutik Oqartussat piffissami tamatuma tungaanut, nuna tamakkerlugu pilersaarusiornermut malitassianik, tak. § 8, tamanna pisariaqartoq naliliisoqassappat, suliaqarsinnaammata.

Imm. 4-imut

Aalajangersakkami aalajangersarneqarpoq, maleruagassat atugassarititaasussallu pilersaarusiornermut nunaminertanullu suliaasaqarfimmi inatsit siusinnerusukkut atuuttoq tunngavigalugu aalajangersagaasut atuutiinnassasut, atorunnaarsinneqarnissamik imaluunniit Inatsisartut peqqussutaat manna imaluunniit Inatsisartut peqqussutai allat tunngavigalugit maleruagassanik atugassarititaasussanillu aalajangersakkanik taarserneqarnissamik tungaanut. Taamaalilluni maleruagassat makkua peqqussutip atuutilernerani atuutiinnarput:

Kalaallit Nunaanni savaateqarnermut nunaminertanik atugassiissuteqartarneq pillugu nalunaarut nr. 385, 27. juli 1979-imeersoq.

Kommunikkaartumik pilersaarusiornermi allanngutsaaliuisussaanermik nakkutiginnittusaaaneq pillugu Namminersornerullutik Oqartussat nalunaarutaat nr. 31, 30. oktober 1991-imeersoq.

Illuliortiternermi oqartussaassuseq pillugu Namminersornerullutik Oqartussat nalunaarutaat nr. 13, 18. august 2006-imeersoq.

§ 45-mut

Aalajangersagaq ikaarsarnermut aalajangersagaavoq aammalu kommunalbestyrelsip illoqarfiup ilaanut pilersaarutinik, suliaasaqarfimmut inatsisit siusinnerusukkut atuuttut naapertorlugit suliarineqarsimasunik, saneqqutsinissamut immikkut akuersissuteqarnissamut aalajangiisinnaatitaanerannik aalajangersaalluni. Immikkut ittumik akuersissuteqarsinnaanermik piginnaatitaaffimmi pineqanngillat kommunimut pilersaarutinik, kommunimut pilersaarutinut tapiliussanik imaluunniit asimut pilersaarutinik Inatsisartut peqqussutaat nr. 6, 19. december 1986-imeersoq malillugu suliarineqarsimasunik, saneqqutsinissamut immikkut ittumik akuersissuteqartarneq.

§ 46-mut

Aalajangersagaq ikaarsarnermut aalajangersagaavoq. Nunaminertat atorneqarnerat pilersaarusiornerlu pillugit Inatsisartut peqqussutaat nr. 6, 19. december 1986-imeersumi § 21 naapertorlugu kommunimit aalajangiinerit pillugit naammagittaalliuutit Naalakkersuisunit suliarineqartarput. Aaqqissuussineq taanna

pilersaarutitut aamma nunaminertanut naammagittaalliuuteqartarfiup
pilersinneqarnissaata tungaanut atuutsiinnerneqarpoq.

Imm. 1-imut

Pilersaarutitut aamma nunaminertanut naammagittaalliuuteqartarfiup
pilersinneqarnissaata tungaanut kommunip aalajangiineri pillugit
naammagittaalliuutit apeqqutitut inatsisinut tunngasortai Naalakkersuisunut suli
naammagittaalliuutigineqarsinnaassapput. Kommunalbestyrelsip aalajangiineri
allaffissornikkut oqartussanut allanut naammagittaalliuutigineqarsinnaanissaat
aalajangersakkami taamaalilluni qularnaarneqarpoq.

Imm. 2-imut

Siunnersuut imaluunniit maleruagassat taanna tunngavigalugu aalajangersagaasut
naapertorlugit aalajangiinerit Naalakkersuisunut
naammagittaalliuutigineqarsinnaassasut naleqqutsinneqarpoq.
Naammagittaalliuuteqarsinnaanermut piginnaatitaasut tassaapput inuk imaluunniit
inuit toqqaannartumik kallarneqartut aamma kinaluunniit suliap inerneranik
imminut tunngatillugu imaluunniit annertuumik soqutigisaqartutut
naatsorsuutigineqartoq, tassani eqqarsaatigineqarlutik inuinaat,
soqutigisaqatigiiffiit aamma pisortani oqartussat.

Imm. 3-imut

Naammagittaalliornissamut piffissarititaavoq kommunalbestyrelsip
aalajangiinerminik nalunaaruteqarnerata kingorna kingusinnerpaamik sapaatit
akunneri 8-it qaangiunnerini.

Kommunip aalajangiinera pillugu naammagittaalliuuteqarnissamut piffissarititaasoq
aalajangersarneqarpoq, sanaartortitsisup nunaminertamut atugassiissutaasumut
atuuttumut naapertuuttumik sanaartugassatut pilersaarutaasumik
piviusunngortitsisinnaanissaata qularnaariffigineqarnissaa siunertaralugu.
Sanaartortitsisoq imaluunniit illuummik piginnittoq taamaalilluni sanaartugassamik
piviusunngortitsisinnaasserluni piffissap aalajangersimasup iluani
paasisaqarsinnaassaaq.